



JUDICIAL SYSTEM MONITORING PROGRAMME

PROGRAMA MONITORIZASAUN BA SISTEMA JUDISIÁRIU



NORWEGIAN EMBASSY

SUMÁRIU KAZU | VIOLÉNSIA BAZEIA BA JÉNERU

Fevereiru

2015

Introdusaun

Iha Fevereiru 2015, Unidade Justisa ba Feto no Labarik (*Women's and Children Justice Unit WCJU*) kontinua monitoriza kazu violénsia bazeia ba jéneru iha Jurisdisaun Tribunál Distritál Dili, Tribunál Distritál Suai no Tribunál Distritál Baucau. Iha edisaun ne'e sumárizá kazu 56 ne'ebé julga iha tribunál hirak ne'e.

Kazu 56 ne'e, kazu 41 klasifikadu nu'udar krime ofensa ba integridada física simples ho natureza violénsia doméstika, kazu 4 involve maus tratus ba kónjuje, kazu 1 maus tratus ba menór, kazu 3 abuzu seksuál ba menór, kazu 4 violasaun seksuál, kazu 2 koasaun seksuál no kazu 1 involve krime tentativa omisidui.

Hosi total kazu hirak ne'e, kazu 3 mak kondena ho pena prizaun, kazu 19 kondena ho pena prizaun maibé suspende, kazu 7 kondena ho pena multa, kazu 14 adia tanbá interesadu sira la kumpri notifikasaun, kazu 1 kondena ho pena admoestasaun, kazu 1 omologa, no kazu 11 seluk sei iha prosesu nia laran.

JSMP apresia kazu ne'ebé julga ho Nú. Prosesu: 302/14.TDDIL tanba tribunál utiliza instrumentu legal CEDAW nu'udar referensia hodi halo desizaun. Desizaun ne'e nu'udar prátika di'ak atu asegura justisa ba vítima violénsia bazeia ba jéneru, nune'e mós enkoraja publiku nia asesu ba justisa fórmal.

Desizaun ne'e mós hanesan progresu ida husi diskusaun meza redonda ne'ebé mak JSMP ho UN Women realiza iha 4 Dezembru 2014 ho profesionál legal feto sira hanesan juis, ministériu públiku, defensoria públiku nomós advogada privada sira ho tema "aplikasaun instrumentu CEDAW iha prátika judisiáriu."

Tuir mai deskripsaun sumáriu julgamentu ba kazu kompletu:

1. Krime ofensa ba integridade fízika simples ho natureza violénsia doméstika - Nú

Prosesu: 252/12/PDBAU

Kompozisaun tribunál : Singular
Juis : Dr. Hugo da Cruz Pui
Ministériu Públiku : Dr. Alfónso Lopes
Defeza : Dr. Juvinal Yanes Freitas (defensória públiku)
Konkluzau : Kondena ho pena admoestasaun

Iha 03 Feveiru 2015, Tribunál Distritál Baucau julga arguidu TFBA ne'ebé komete krime violénsia doméstika hasoru nia feen, iha Distritu Baucau.

Ministériu Públiku akuza katak iha 23 Maiu 2013, arguidu lori katana baku iha lezada nia kotuk laran kauza moras no mean. Kazu ne'e akontese tanba arguidu ho lezada diskuti malu tanba arguidu atu han meudia maibe ai-manas laiha, tanba ne'e mak arguidu hirus no lezada tolok arguidu no kauza arguidu halo agresaun hasoru lezada.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 2, 3 no 35 Lei Kontra Violénsia Doméstika.

Iha julgamentu, arguidu konfesa integralmente faktus iha akuzasaun, deklara katak nia baku lezada tanba lezada tolok nia iha ema barak nia oin. Arguidu mós deklara katak sira moris hamutuk desde 1997 to'o agora, sira iha ona oan nain 6 no fóin primeiraves baku lezada. Agora sira di'ak malu ona no moris hamutuk hanesan feen-laen.

Arguidu servisu nu'udar karpinteiru fulan ida hetan osan US\$200 to'o US\$300. Tanba arguidu konfesa ba faktus, Ministériu Públiku husu atu la presiza rona depoimentu husi lezada no testamuña.

Iha alegasaun finál, ministériu públiku konsidera faktus hotu provadu tuir konfisaun arguidu nian. Atu halo prevensaun ba krime ne'e labele akontese tan iha futuro, husu ba tribunál atu aplika pena adekuadu ba arguidu.

Enkuantu defeza husu ba tribunál atu konsidera sirkunstansia atenuante arguidu nian hanesan konfesa, diak malu ona, fóin primeiravez komete krime, no kondisaun ekonómia arguidu nian, nune'e, husu ba tribunál atu aplika pena multa.

Depoizde rona tiha alegasaun husi parte sira, tribunál konklui prosesu ne'e no kondena arguidu ho pena admoestasaun no selu mós kusta judisiál US\$10.

2. Krime ofensa ba integridade fízika simples ho natureza violénsia doméstika - Nú

Prosesu: 0024/14.BCSIC

Kompozisaun tribunál : Singular
Juis : Dr. Hugo da Cruz Pui

Ministériu Públiku : Dr. Alfónso Lopes
Defeza : Dr. Jonas Hendrique (defensória públiku)
Konkluzau : Kondena ho pena multa

Iha 03 Feveireiru 2015, Tribunál Distritál Baucau prejide leitura sentensa no kondena arguidu AdCdJ (laen) no NdCdJ (oan-mane) ho pena multa tanba komete krime violénsia doméstika hasoru lezada, iha Distritu Baucau.

Antes ne'e, ministériu públiku akuza arguidu sira kontra artigu 145 Kódigu Penál kona-ba ofensa ba integridade física simples konjuga ho artigu 2, 3 no 35 Lei Kontra Violénsia Doméstika.

Tribunál prova katak arguidu AdCdJ tuku dala rua iha lezada nia liman no ulun. Maibe tribunál la prova faktu kona-ba arguidu rakut lezada nia fuuk no brinkus no kauza kanek kman.

Tribunál prova mós katak arguidu NdCdJ basa dala ida iha lezada nia hasan maibe oras ne'e dadaun arguidu sira dame malu ona no kontinua moris hamutuk.

Bazeia ba faktus ne'ebé produz durante julgamentu, tribunál konklui prosesu ne'e no kondena arguidu AdCdJ ho pena multa US\$60.00.

Entertantu ba arguidu NdCdJ, tribunál konklui no kondena ho pena multa US\$110, no selu mós kusta judisial US\$20. Tribunál mós fixa pena alternativu durante loron 80 prizaun, wainhira la kumpri pena multa ne'e.

3. Krime maus tratus ba kónjuje – Nú. Prosesu: 386/12/PD.BAU

Kompozisaun tribunál : Koletivu
Juis : Dr. Afónso Carmona
: Dr. Hugo da Cruz Pui
: Dr. Jose Escurial (juis estajiáriu)
Ministériu Públiku : Dr. Dominggos Barreto
Defeza : Dr. Grigorio Delima (defensória públiku)
Konkluzau : Sei kontinua prosesu

Iha 03 Feveireiru 2015, Tribunál Distritál Baucau hala'o julgamentu ba kazu maus tratus ba kónjuje ne'ebé involve arguidu NGdC hasoru nia feen, iha Distritu Baucau.

Ministériu Públiku akuza katak iha 7 Agostu 2012, arguidu lori ai-dona baku lezada nia kotuk-laran iha parte karuk nian no baku iha liman kabun iha parte loos. Aktu hirak ne'e kauza lezada sofre moras no bubu. Kazu ne'e akontese tanba lezada fo hanoin ba arguidu katak nusa la buka servisu, maibé gosta pasiar deit.

Aleinde ne'e, iha data ne'ebé la apuradu, arguidu tebe no soku iha lezada nia isin lolon. Ministériu Públiku mós akuza katak arguidu baku bebeik lezada ho fórma ne'ebé hanesan.

Tuir mai iha 23 Feveireiru 2013, arguidu kontinua baku lezada tanba lezada tein sasoro no husik hela labarik tanis.

Relasiona ho aktu hirak ne'e, ministériu públiku akuza arguidu kontra artigu 154 Kódigu Penál kona-ba maus tratus ba kónjuje konjuga ho artigu 35 Lei Kontra Violénsia Doméstika.

Iha julgamentu, arguidu rejeita akuzasaun kona-ba baku bebeik katak ne'e la-loos. Arguidu deklarara katak nia baku duni lezada dala ida, tolok no ameasa duni lezada maibé la-lori ai-dona baku lezada.

Arguidu deklarara mós katak iha 23 Feveireiru 2013, arguidu lori au (bambu) baku dala ida iha lezada nia liman. Problema ne'e mosu tanba lezada lori fatuk tuda uluk sira-nia viziñu nia odamatan, wainhira arguidu nonton hela televizaun iha viziñu nia uma.

Husi akontesimentu ne'e lezada halai husi uma, ba keixa iha xefe aldeia no polisia Agora dadaun sira hela separadu no arguidu hola ona fetu seluk.

Iha lezada nia depoimentu haktuir katak arguidu baku duni ho ai-dona no durante sira moris hamutuk hahú husi oan primeiru arguidu komesa baku lezada to'o sira hetan oan nain haat. Lezada deklarara katak arguidu baku lezada hamutuk dala rua-nulu desde sira moris hamutuk.

Aleinde arguidu baku bebeik no arguidu mós laiha responsabilidade ba sira-nia uma kain, lakohi halo servisu no hakarak la'o pasiar de'it. Lezada deklarara katak nia lakohi fila ba uma tanba tauk arguidu.

Testamuña nain rua ne'ebé notifika, ida moras no ida falta. Ministériu Públiku husu atu rona testamuña rua ne'e. Tetamuña ne'ebé moras apresenta atestadu mediku no tetamuña ida seluk la justifika tenke selu multa.

Depoisde rona tiha deklarasaun husi arguidu no lezada, tribunál marka fali agenda julgamentu hodi rona depoimentu testamuña iha 11 Feveireiru 2015 tuku 14:00 lokraik.

4. Krime abuzu seksuál ba menór – Nú. Prosesu: 0140/13.PDBAU

Kompozisaun tribunál	: Koletivu
Juis	: Dr. Afónso Carmona (reprezenta juis koletivu)
Ministériu Públiku	: Dr. Alfónso Lopes
Defeza	: Dr. Mario Fernandes (advogadu privadu)
Konkluzau	: Adia

Iha 03 Feveireiru 2015, Tribunál Distritál Baucau adia prosesu julgamentu ba kazu krime abuzu seksuál ba menór ne'ebé involve arguidu OB, iha Distritu Baucau.

Kazu ne'e adia ba fali iha 11 Marsu 2015, iha tuku 14.00 lokraik, tanbá arguidu la hatene ko'alia lian Tetun. Tanba ne'e tribunál adia julgamentu hodi buka tradutor ba lian lokal "Uaimoa"

5. Krime koasaun seksuál-Nú. Prosesu: 0152/13.PDBAU

Kompozisaun tribunál : Koletivu
Juis : Dra. Ercilia de Jesus (reprezenta juis koletivu)
Ministériu Públiku : Dr. Alfónso Lopes
Defeza : Dr. Jonas Hendrique (defensória públiku)
Konkluzau : Adia

Iha 04 Feveiru 2015, Tribunál Distritál Baucau adia julgamentu ba kazu krime koasaun seksuál ne`ebé involve arguidu TB hasoru lezada ho estatuto nu`udar sidadaun estránjeiru, iha Distritu Baucau.

Kazu ne`e la konsege julga tanba arguidu la marka prezensa iha tribunál maske hetan ona notifikasaun. Aleinde ne`e, lezada rasik sertidaun negativa tanba fila ona ba nia nasaun Alemaña. Testamuña nain haat notifikadu, ida mak marka prezensa nain tolu falta.

Ministériu Públiku hato`o nia pozisaun prosesuál tuir artigu 256 Kódigu Prosesu Penál arguidu tenke selu multa US\$15 atu asegura arguidu no testamuña sira-nia prezensa.

Ministériu Públiku mós husu halo detensaun ba testamuña nain tolu tuir artigu 261 Kódigu Prosesu Penál kona-ba lezadu no testamuña nia falta, artigu 271 Kódigu Prosesu Penál kona-ba testamuña nia deklarasaun nomós artigu 217 Kódigu Prosesu Penál kona-ba detensaun nia finalidade, hodi asegura komparensia imediata. Enkuantu defeza husu ba tribunál atu marka data foun ba julgamentu.

Bazeia ba artigu 255 Kódigu Prosesu Penál kona-ba audensia nia inisiu ka adiantu, artigu 256 Kódigu Prosesu Penál kona-ba arguidu nia falta no artigu 261 Kódigu Prosesu Penál kona-ba lezadu no testamuña nia falta, tribunál adia julgamentu ba kazu ne`e.

Ba arguidu no testamuña sira la justifika tribunál sei aplika multa no aplika detensaun hodi partisipa iha julgamentu no tribunál marka fali agenda julgamentu ba iha 27 Maiu 2015, iha tuku 14:30 lokraik.

6. Krime ofensa ba integridade física simples ho natureza violência violência doméstica – Nú. Prosesu: 0300/14.PDBAU

Kompozisaun tribunál : Singular
Juis : Dr. Afónso Carmona
Ministériu Públiku : Dr. Pascasio Rosa Alves
Defeza : Dr. Jonas Hendrique (defensória públiku)
Konkluzau : Kondena ho pena prizaun fulan 6 suspende ba tinan 1

Iha 05 Fevereiru 2015, Tribunál Distritál Baucau prejide leitura sentensa no aplika pena suspensaun ba arguidu FS tanba provadu komete krime violénsia doméstika hasoru nia feen, iha Distritu Viqueque.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 2, 3 no 35 Lei Kontra Violénsia Doméstika.

Tribunál prova katak iha 7 Abril 2013 kalan, ema tuda uma, arguidu diskunfia lezada mak kombina malu ho mane seluk hodi tuda uma, tanba ne'e mosu haksasuk malu entre arguidu ho lezada.

Tribunál prova mós katak arguidu tuku dala tolu iha lezada nia hasan no soku dala ida iha matan fukun.

Depoisde avalia prosesu hirak ne'e hotu, tribunál konklui katak atu kontribui prevene krime ne'e, tribunál kondena arguidu ho pena prizaun fulan 6 suspende ba tinan 1.

7. Krime violasaun seksuál no koasaun seksuál - Nú. Prosesu: 0191/14.PDBAU

Kompozisaun tribunál	: Koletivu
Juis	: Dr. Hugo da Cruz Pui
	: Dr. Afonso Carmona
	: Dr. Jose Quintão (juis estajiáriu)
Ministériu Públiku	: Dr. Alfónso Lopes
Defeza	: Dr. Juvinal Yanes Freitas (defensória públiku)
Konkluzau	: Sei kontinua prosesu

Iha 06 Fevereiru 2015, Tribunál Distritál Baucau julga arguidu RS tanba komete krime violasaun seksuál no koasaun seksuál hasoru lezada, iha Distritu Baucau.

Ministériu Públiku akuza katak iha 4 Marsu 2014, arguidu kaer lezada nia liman dada ba uma laran lori liman taka lezada nia ibun, lori ba quarta laran, hasai lezada nia roupa no halo relasaun seksuál obrigatoriamente ho lezada.

Ministériu Públiku akuza arguidu kontra artigu 171 Kódigu Penál kona-ba koasaun seksuál no artigu 172 Kódigu Penál kona-ba violasaun seksuál.

Iha julgamentu, arguidu rekuza faktu sira husi akuzasaun no deklarata katak arguidu sai husi haris fatin, hare lezada hamrik sein roupa (isin-molik) no lezada mak hako'ak uluk arguidu. Arguidu deklarata mós katak la obriga lezada, tanba sira hako'ak malu mak tama ba kuartu laran. Depoisde halo tiha relasaun seksuál ho lezada, arguidu ba kedas Manututo.

Tribunál konfirma ho lezada deklarata katak akuzasaun ministériu públiku nian loos hotu, katak arguidu ameasa lezada atu oho lezada. Lezada mós deklarata katak nia sente triste tanba lakon nia virjen no sente moe ba comunidade.

Testamuña deklara katak nia hare ho matan arguidu kaer lezada nia liman dada ba uma laran no taka odamatan. Testamuña besik ba uma ninin rona lezada hakilar iha kuartu laran, tanba tauk testamuña bolu viziñu nain rua, ba hare lezada. To'o iha odamatan arguidu sai mai ho toalla deit, no dehan ba testamuña sira atu tuur hodi rezolve. Depois arguidu halai liu ba terminal, testamuña sira telefóne polísia hodi lori lezada ba kantor polísia.

Iha alegasaun finál, ministériu públiku haktuir katak, mezmú arguidu nega faktú sira maibé lezada no testamuña deklara loloos katak arguidu dada lezada ho fórsa. Tanba ne'e, ministériu públiku husu atu kondena arguidu tinan 14 prizaun.

Defeza haktuir katak iha produsaun ba prova arguidu rekuza faktú sira husi akuzasaun. Lezada no testamuña deklara faktus, maibé ameasa atu oho la'os deklarasaun husi inkeritu inisiu, tanba ne'e tribunál mak tenke prova loloos, no husu atu absolve arguidu.

Depoide rona tiha alegasaun husi parte sira, tribunál marka fali julgamentu ba leitura akordaun iha 19 Feveireiru 2015 tuku 14:00 loraik.

8. Krime tentativa omisidiu - Nú.Prosesu: 1183/14/TDD

Kompozisaun tribunál	: Koletivu
Juis	: Dra. Jacinta Correia da Costa
	: Dra. Maria Modesta (juis estajiáriu)
	: Dra. Sribuana da Costa (juis estajiáriu)
Ministériu Públiku	: Dr. Matias Soares
Defeza	: Dr. Estaquio Guterres (defensória públiku estajiáriu)
Konkluzau	: Sei kontinua prosesu

Iha 17 Feveireiru 2015, Tribunál Distritál Dili, julga arguidu CS ne`ebé komete krime tentativa omisidiu hasoru lezada FdR (viziñu), iha Distritu Ermera.

Ministériu Públiku akuza katak iha 26 Juñu 2014, arguidu tama ba uma laran taa lezada nia kotuk laran, dala haat iha liman loos, dala ida iha liman karuk, taa dala ida tan iha liman fuan karuk dala tolu no taa iha ain-loos dala ida.

Kazu ne'e akontese tanba lezada nia maun kaben ho arguidu nia feton no soe/husik tiha no ba hola fali fetó seluk. Wainhira arguidu nia alin fetó ba ku'u kafe, AdRS (testamuña) tuir ba kafé laran tuda no halo violasaun seksuál.

Ministériu Públiku akuza arguidu kontra artigu 138 Kódigu Penál kona-ba omisidiu simples no artigu 24 Kódigu Penál kona-ba tentativa nia punibilidade.

Iha julgamentu arguidu rekoñese faktú sira iha akuzasaun katak ne'e loos hotu. Arguidu deklara katak nia intensaun atu taa AdRS, maibé tanba AdRS halai tiha, no lezada dehan ba arguidu

katak AdRS la sala ida, tanba ne'e mak arguidu nervozu hodi taa lezada. Arguidu mos deklarata katak komete aktu ne'e tanba AdRS halo violasaun seksuál ba nia feton.

Lezada haktuir katak arguidu taa nia iha 26 Juñu 2014, iha kuartu laran. Arguidu taa iha lezada nia ulun no kotuk laran no kauza lezada oin nakukun no monu ba rai no depois la hatene taa dala hira. Lezada mos dehan katak arguidu duni tuir nia mak taa, no monu ba rai arguidu husik hela. Lezada dehan katak tuir informasaun hosi polisia nia sofre kanek ne'e sanulu resin rua.

Testamuña EPI (lezada nia kuñada) deklarata katak arguidu taa lezada iha tuku 21:00 kalan, iha lezada nia kuartu. Arguidu tuda odamatan to'o rahun tama ba uma laran, taa fiu listrik no lampu mate mak tama ba lezada nia kuartu.

AdRS ne'ebé antes ne'e nu'udar alvu ba arguidu no notifika hanesan testemuña deklarata katak arguidu tuda odamatan nakloke, taa fiu kotu no lampu mate tama ba taa lezada. AdRS mos deklarata katak nia halo relasaun seksuál ho arguidu nia alin feto iha 29 Maiu 2010. AdRS mos haktuir katak nia gasta osan ba transporte no hahan durante lezada halo tratamentu iha óspital hamutuk US\$200.

Iha alegasaun finál, ministériu públiku haktuir katak arguidu konfesa faktus, konfirma mos ho deklarasaun lezada no testamuña nian. Tanba ne'e, husu ba tribunál atu kondena arguidu tinan 12 prizaun no selu mos indemnizasaun sivil US\$200 ba lezada.

Ministériu Públiku mos husu ba tribunál atu revoga medida koasaun TIR ne'ebe antes ne'e aplika ba arguidu ba fali prizaun preventiva hodi hein desizaun tranzitu iha julgadu. Razaun altera medida koasaun ne'e atu labele akontese krime seluk.

Defeza haktuir katak arguidu konfesa no ezekuta faktus ne'e tanba iha motivasaun katak testamuña viola nia alin feton. Tanba ne'e, husu ba tribunál atu fo justisa ba arguidu. Defeza mos husu ba tribunál katak la konkorda atu revoga medida koasaun.

Depoisde rona tiha alegasaun husi parte sira, tribunál marka fali agenda julgamentu ba leitura akordaun iha 2 Marsu 2015 tuku 11:00 meudia.

9. Krime maus tratus ba kónjuje - Nú. Prosesu: 0022/12.DISIC/1102/14.TDDIL

Kompozisaun tribunál	: Koletivu
Juis	: Dra. Zumiaty Freitas
	: Dra. Jacinta Correia da Costa
	: Dr. Antonio Helder do Carmo
Ministériu Públiku	: Dra. Benvinda da Costa do Rosario
Defeza	: Dr. Marçal Mascarenhas (defensória públiku)
Konkluzau	: Sei kontinua prosesu

Iha 18 Feveireiru 2015, Tribunál Distritál Dili hala' o julgamentu ba kazu maus tratus ba kónjuje ne`ebé komete husi arguidu ASD hasoru nia feen, iha Distritu Dili.

Ministériu Públiku akuza katak iha 16 Juñu 2012, arguidu basa lezada dala rua, tuku no tebe lezada nia isin no riba ba parede.

Tuir mai iha 17 Juñu 2012, arguidu tuku iha lezada nia hirus matan, tebe no baku ho besi kurtiña nian no kauza bubu metan iha lezada nia isin.

Iha 18 Juñu 2012 arguidu basa, tuku, tebe no kontinua lori besi kurtiña baku lezada nia isin no sulan lezada iha kuartu.

Iha 19 Juñu 2012, arguidu kontinua halo agresaun ba lezada no riba lezada ba parede. Iha 20 Juñu 2012 tuku 02:00 madrugada, arguidu basa, tuku no tebe lezada nia kabun kidun no kauza la' o ladi'ak. Arguidu les lezada nia roupa no husik toba molik iha kuartu. Iha 21 Juñu 2012 arguidu kontinua halo agresaun ho fórma hanesan buti iskeiru lakan sunu ba lezada nia fuuk. Iha 22 Juñu 2012 arguidu lori sigaru sunu lezada nia fuuk.

Motivu husi akontesementu ne`e tanba iha 15 Juñu 2012 viziñu telfóne ba arguidu ne`ebé iha hela Same katak lezada sai ho mane seluk ba halo relasaun seksuál.

Ministériu Públiku akuza arguidu kontra artigu 154 Kódigu Penál kona-ba maus tratus ba kónjuje no artigu 160 Kódigu Penál kona-ba sekuestru konjuga ho artigu 35 Lei Kontra Violénsia Doméstika.

Iha julgamentu, arguidu konfesa faktus hotu no deklarata katak baku lezada ho intensaun atu hatene tuir mane ne`ebé sai ho lezada. Arguidu mós konfirma katak nia lori sigaru sunu lezada nia fuuk, les lezada nia roupa no riba lezada ba parede tanba hetan mane nia númeru telfóne iha lezada nia sepatu sola okos.

Lezada deklarata katak, kazu ne`e akontese tanba viziñu telfóne ba arguidu katak lezada sai ho mane seluk. Lezada konfirma faktus iha akuzasaun no deklarata katak nia la iha relasaun ho mane seluk. Depoizde akontesementu arguidu ho lezada nia familia rezolve ona problema ne`e.

Testamuña MdC (viziñu) dehan ho nia laen kaer mane ida mai tula lezada iha tuku 21:00 kalan no fila-fali mai uma iha tuku 22:00 kalan. Testamuña ne`e dehan katak baku malu sira la hare tanba uma dook malu no baku-malu iha kuartu laran, rona deit infórmasaun husi labarik sira.

Iha alegasaun finál, Ministériu Públiku haktuir katak arguidu konfesa faktus sira, no kontinua reforsa hosi deklarasaun lezada. Deklarasaun lezada no arguidu la prienxe krime sekuestru tanba arguidu laiha intensaun hasai lezada nia liberdade, tanba ne`e husu atu absolve arguidu hosi krime sekuestru.

Enkuantu, ba krime maus tratus ba kónjuje, ministeriu publiku husu fó pena edukativa ba prevensaun espesial, husu kondena arguidu ho pena prizaun tinan 3 suspende ba tinan 5.

Defeza haktuir katak agresan ne'e priende krime maus tratus ba kónjuje, husu ba tribunál atu hare sirkunstánsia hotu, tanba arguidu konfesa nu'udar atenuasaun ekstraordinaria tanba ne'e defeza husu pena ne'ebé kman.

Depoisde rona tiha alegasaun husi parte sira, tribunál marka fali agenda julgamentu ba leitura akordaun iha 4 Marsu 2015 tuku 14:00 lokraik.

10. Krime ofensa ba integridade fízika simples no krime ameasa ho natureza violénsia doméstika - Nú. Prosesu: 330/2014/TDDIL

Kompozisaun tribunál : Singular
Juis : Dra. Jacinta Correia da Costa
Ministériu Públiku : Dra. Ivonia Maria Guterres
Defeza : Dr. Jose Guterres (defensória públiku estajiáriu)
Konkluzan : Kondena ho pena prizaun tinan 2 suspende ba tinan 3

Iha 13 Feveireiru 2015, Tribunál Distritál Dili prejide leitura sentensa no kondena arguidu AF tanba komete krime violénsia doméstika hasoru nia eis feen, iha Distritu Dili.

Antes ne'e, ministériu públiku akuza arguidu kontra artigu 145 Kódigu Penál kona-ba ofensa ba integridade fízika simples no artigu 157 Kódigu Penál kona-ba ameasa konjuga ho artigu 35 Lei Kontra Violénsia Doméstika.

Tribunál prova katak arguidu dudu lezada monu ba rai no ameasa lezada ho katana. Tribunál prova mós katak problema ne'e mosu tanba arguidu no lezada haksesuk-malu kona-ba osan halai kareta nian ne'ebé arguidu la entrega ba lezada.

Tribunál halo kumulasaun juridika ba krime ofensa ba integridade fízika simples ho krime ameasa, no konklui kondena arguidu ho pena prizaun tinan 2 suspende ba tinan 3.

11. Krime ofensa ba integridade fízika simples ho natureza violénsia doméstika - Nú. Prosesu: 0209/14.DICMR

Kompozisaun tribunál : Singular
Juis : Dra. Ana Paula Fónseca
Ministériu Públiku : Dr. Rogerio Vicenti (prokuradór estajiáriu)
Defeza : Dra. Marcia Sarmiento (defensória públiku)
Konkluzan : Kondena ho pena prizaun tinan 1 suspende ba tinan 2.

Iha 26 Feveireiru 2015 Tribunál Distritál Dili, prejide leitura sentensa ba arguidu AdSG tanba komete krime violénsia doméstika hasoru nia feen, iha Distritu Dili.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 2, 3 no 35 Lei Kontra Violénsia Doméstika.

Depoizde avalia faktu sira ne'ebé produz durante julgamentu, tribunál prova katak arguidu baku dala barak hasoru lezada.

Tribunál hare katak krime violénsia doméstika adekuaudu liu atu fó kastigu prizaun hodi bele redus krime ne'e. Bazei aba faktus provadu no sirkunstánsia atenuante no agravante ne'ebé haleu krime ne'e, tribunál konklui prosesu ne'e no kondena arguidu ho pena prizaun tinan 1 suspende ba tinan 2. Tribunál mós fixa devér adisionál ba arguidu atu apresenta a'an ba polisia kada fulan dala ida to'o tinan 2.

12. Krime ofensa ba integridade fízika simples ho natureza violénsia doméstika - Nú.

Prosesu: 758/2014/TDDIL.

Kompozisaun tribunál : Singular
Juis : Dra. Francisca Cabral
Ministériu Públiku : Dra. Benvinda da Costa do Rosario
Defeza : Dr. Jose da Silva (defensória públiku)
Konkluzau : Omologa

Iha 4 Feveireiru 2015, Tribunál Distritál Dili prejide julgamentu konsiliaun no omologa pedidu desistensia keixa ba krime ofensa ba integridade fízika simples ne'ebé komete husi arguidu AJM hasoru nia alin fetu, iha Distritu Dili.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples.

Antes hahu julgamentu ba kazu ne'e, tribunál husu ba arguidu no lezada kona-ba arguidu no lezada nia relasaun no arguidu deklara ba tribunál katak lezada nu'udar arguidu nia alin fetu rasik no sira hela iha uma ida de'it. Mezmu arguidu deklara ona ba tribunál, maibé tribunál kontinua konsilia kazu ne'e no omologa dezistensia keixa husi lezada.

Atu hetan informasaun kompletu ba kazu ne'e bele hare'e iha press release ne'ebé publika ona iha 10 Feveireiru 2015, iha: www.jsmp.tl.

13. Krime ofensa ba integridade fízika simples ho natureza violénsia doméstika - Nú.

Prosesu: 890/14.TDDIL

Kompozisaun tribunál : Singular
Juis : Dra. Francisca Cabral
Ministériu Públiku : Dr. Renato Bere Nahak
Defeza : Dr. Abilio Pereira (defensória públiku estajiáriu)
Konkluzau : Kondena ho pena multa

Iha 12 Feveireiru 2015, Tribunál Distritál Dili prejide leitura sentensa no kondena arguidu BFdJ tanba komete krime violénsia doméstika hasoru nia feen, iha Distritu Dili.

Ministériu Públiku akuza katak iha 19 Janeiru 2011, arguidu basa lezada ninia ren-toos dala 2, tanba lanu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa integralmente faktu sira iha akuzasaun, tanba ne'e ministériu públiku husu atu la prezisa rona tan depoimentu hosi testemuña.

Iha alegasaun finál, ministériu públiku konsidera katak faktu hotu-hotu provadu tuir konfisaun arguidu nian, tanba ne'e husu ba tribunál fó pena adekuaadu atu asegura arguidu la repete tan krime hanesan iha futuro.

Defeza husu ba tribunál atu konsidera sirkunstánsia atenuante sira hanesan arguidu arepende, konfesa faktu sira no kolabora di'ak ho tribunál, nune'e husu ba tribunál fó pena ne'ebé justu ba arguidu.

Bazeia ba faktu provadus sira ne'ebé mak produz durante julgamentu tribunál konklui prosesu ne'e no kondena arguidu ho pena multa US\$30, ne'ebé sei selu 0.50 sentavus kada loron. Alternativamente tribunál mós fiksa pena prizaun durante loron 60 wainhira kondenadu la kumpri pena multa ne'e.

14. Krime ofensa ba integridade física simples ho natureza violénsia doméstika - Nú. Prosesu: 1051/14.TDDIL.

Kompozisaun tribunál	: Singular
Juis	: Dra. Jumiaty Freitas
Ministériu Públiku	: Dra. Benvinda da Costa do Rosario
Defeza	: Dr. Cancio Xavier (defensória públiku)
Konkluzau	: Sei kontinua prosesu

Iha 12 Fevereiru 2015, Tribunál Distritál Dili julga arguidu NFT tanba komete krime violénsia doméstika hasoru nia feen, iha Distritu Dili.

Ministériu Públiku akuza katak iha 10 Marsu 2012, arguidu fóti lezada nia telefóne tuda rahun no tuku lezada nia kabas too bubu no metan. Motivu husi akontesimentu ne'e tanba arguidu diskunfia lezada ba mane seluk, wainhira sms ida tama ba iha lezada nia telefóne no arguidu husu atu lee, maibé lezada la fó.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu arguidu hili direitu nonok no tribunál rona deit deklarasaun husi lezada. Iha julgamentu lezada konfirma faktu sira iha akuzasaun no liu tiha semana ida arguidu husu diskulpa perante lezada nia familia.

Iha alegasaun finál, ministériu públiku argumenta katak mezmu arguidu hili direitu nonok, maibe faktus ne'ebé konsta iha akuzasaun provadu. Ministeriu Publiku mós konsidera katak husi hahalok arguidu nian rejulta lezada sofre bubu-metan no tenke hetan tratamentu iha hospital. Tanba ne'e, husu ba tribunál atu kondena arguidu ho pena prizaun tinan 1 fulan 6 no suspende ba tinan 3.

Defeza haktuir katak mezmu akuzasaun provadu maibe bazeia ba deklarasaun lezada nian katak depoisde akontementu, liu tiha semana 1 arguidu husu deskulpa perante lezada nia familia, tanba ne'e husu ba tribunál atu kondena arguidu ho pena prizaun tinan 1 suspende ba tinan 1.

Depoisde rona tiha alesaun husi parte sira, tribunál marka fali agenda julgamentu ba leitura sentensa iha 16 Feveireiru 2015 iha tuku 10:00 dader.

15. Krime abuzu seksuál ba menór - Nú. Prosesu: 817/14.TDD

Kompozisaun tribunál	: Koletivu
Juis	: Dra. Jacinta Correia da Costa (representa juis koletivu)
Ministériu Públiku	: Dr. Reinato Bere Nahak
Defeza	: Dr. Manuel Sarmiento (defensória públiku)
Konkluzau	: Pena prizaun tinan 6 fulan 6

Iha 2 Feveireiru 2015, Tribunál Distritál Dili prejide leitura akordaun hodi kondena arguidu AS ho pena prizaun tinan 6 fulan 6 no selu indemnizasaun sivil ba lezada ho osan US\$500.00 tanbá provadu komete krime abuzu seksuál ba menór, iha Distritu Dili.

Tribunál prova katak 27 Abril 2014, lezada sai hosi haris fatin atu ba habai toalla, arguidu hosi kotuk hakoak lezada, ka'er lezada nia isin sira no rei lezada. Depoisde halo tiha aktu, arguidu husu ba lezada atu halo relasaun seksuál, maibé lezada esfórsu hodi hases-an hosi arguidu.

Arguidu mós ameasa lezada atu oho mate kuandu lezada hateten sai problema ne'e ba ema seluk. Arguidu komete krime, bainhira lezada nia inan-aman ba tuir misa iha Tasi-tolu. Tribunál mós prova katak problema ne'e akontese lezada fóin halo tinan 13.

Ministériu Públiku akuza arguidu kontra artigu 177 Kódigu Penál kona-ba krime abuzu seksuál ba menór.

Faktus provadu hirak ne'e produz tuir akuzasaun Ministériu Públiku, konfisaun parsial hosi arguidu no konfirmasaun hosi lezada.

Bazeia ba faktu provadu ne'ebé produs durante julgamentu no haree ba sirkunstansia atenuante arguidu nian, tribunál konklui kondena arguidu ho pena prizaun tinan 6 fulan 6 no selu mós indemnizasaun sivil US\$500.00

16. Krime koasaun seksuál no furtu agravadu - Nú. Prosesu: 1188/14.TDDIL

Kompozisaun tribunál : Koletivu
Juis : Dra. Jumiaty Freitas
: Dra. Jacinta Correia da Costa
: Dra. Maria Modesta
Ministériu Públiku : Dra. Lidia Soares
Defeza : Dr. José da Silva (defensória públiku)
Konkluzau : Kondena ho pena prizaun tinan 2 fulan 6

Iha 4 no 13 Feveireiru 2015, Tribunál Distritál Dili hala'o julgamentu ba kazu koasaun seksuál no furtu agravadu ne'ebé komete husi arguidu SVN hasoru lezada ACFV, iha Distritu Dili.

Ministériu Públiku akuza arguidu kontra artigu 171 Kódigu Penál kona-ba krime koasaun seksuál no artigu 252 Kódigu Penál kona-ba furtu agravadu.

Julgamentu ba kazu ne'e taka ba públiku. Maibé tuir infórmasaun ne'ebé asesu hosi defeza katak iha deklarasaun arguidu nian arguidu konfesa faktus balun katak nia fóti duni lezada nia telefone maibé nega faktu kona-ba koasaun seksuál.

Hafoin rona deklarasaun hosi arguidu, depoimentu husi lezada no alegasaun hosi ministériu públiku no defeza, tribunál marka fali leitura akordaun ba iha 13 Feveireiru 2015, iha tuku 3 lokraik.

Tribunál konklui prosesu ne'e iha 13 Feveireiru 2015, no kondena arguidu ho pena prizaun tinan 2 fulan 6. Tribunál konsidera katak arguidu provadu komete krime ne'e através hosi tama lezada nia uma iha tempo kalan, selok janela hodi tama ba lezada nia kuartu, naok lezada nia telefone, lamas lezada nia orgaun seksual no kolu lezada nia kalsa.

17. Krime ofensa ba integridade fízika simples ho natureza violénsia doméstika- Nú. Prosesu: 1163/14.TDDIL

Kompozisaun tribunál : Koletivu
Juis : Dra. Jacinta Correia da Costa (representa juis koletivu)
Ministériu Públiku : Dr. Osorio de Deus (prokuradór estajiáriu) no
: Dr. Vicente Brito
Defeza : Dr. Marçal Mascarenhas (defensória públiku)
Konkluzau : Sei kontinua prosesu

Iha 6 Feveireiru 2015, Tribunál Distritál Dili, julga arguidu MJ ne'ebé komete krime violénsia doméstika hasoru nia feen, iha Distritu Ermera.

Ministériu públiku akuza katak iha 18 Juñu 2014, arguidu basa dala haat iha lezada nia hasan no buti lezada nia kakorok. Aktu hirak ne`e rezulta lezada sofre bubu no moras iha lezada nia hasan parte karuk. Motivu husi akontesementu ne`e tanba lezada husu osan arguidu la fó, tanba ne`e mak sira diskute malu.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 2 no 35 Lei Kontra Violénsia Doméstika.

Iha julgamentu arguidu uza direitu nonok. Enkuantu lezada depoimenta katak, iha 18 Juñu 2014, iha tuku 7.00 dadersan, arguidu basa lezada nia hasan karuk dalarua tanba sira nia oan monu hosi kama leten. Lezada haktuir katak kazu ne`e akontese laos tanbá arguidu la fó osan maibé tanbá sira nia oan monu hosi kama leten.

Testamuña AS mós depoimenta katak kazu ne`e akontese tamba labarik monu husi kama leten.

Tanbá depoimentu lezada no testamuña halo duvida no kontrariu ho akuzasaun, tribunál marka fali julgamentu ba iha 27 Feveireiru 2015 iha tuku 11 dadersan, hodi rona deklarasaun ho SDJ nu`udar polisia ne`ebé halo investigasaun ba kazu ne`e.

18. Krime maus tratus ba kónjuje - Nú. Prosesu: 302/14.TDDIL

Kompozisaun tribunál	: Koletivu
Juis	: Dra. Jacinta Coreia (representa juis koletivu)
Ministériu Públiku	: Dr. Reinato Bere Nahak
Defeza	: Dr. Sebastião Amado
Konkluzau	: Kondena ho pena prizaun tinan 3 suspende ba tinan 3

Iha 9 Feveireiru 2015, Tribunál Distritál Dili prejide leitura akordaun no kondena arguidu HGS tanba komete krime maus tratus ba kónjuje, iha Distritu Dili.

Tribunál prova katak iha Feveireiru 2012, arguidu tuku lezada nia oin dala ida no tuku tan dala ida iha kanuruk too monu ba rai. Aktu hirak ne`e kauza lezada nia oin bubu, kanuruk moras, mi-aan no desmaia.

Tuir mai iha 9 Abril 2012, arguidu hodi nia liman sikun fai iha lezada nia oin no rezulta bubu no moras. Tuir fali iha 19 Abril 2013, arguidu hodi aisar baku iha lezada nia matan fukun, haruka lezada hakneak iha kuartu laran, bandu lezada labele kaer telefóne no ba eskola.

Relasiona ho aktu hirak ne`e, ministériu públiku akuza arguidu kontra artigu 154 Kódigu Penál kona-ba krime maus tratus ba kónjuje.

Iha leitura akordaun ne`e, tribunál intrudus ba arguidu kona-ba artigu 1, 2 no 5 iha Konvensaun CEDAW katak nasaun membru hotu-hotu ne`ebé ratifika konvensaun ne`e tenki evita no halakon diskriminasaun hotu-hotu kontra feto.

Depoizde tribunál halo alterasaun ba kualifikasaun juridika hodi konjuga artigu 2, 3 no 35 Lei Kontra Violénsia Doméstika tanba akuzasaun ministériu públiku la konjuga ho artigu 2, 3, no 35 Lei Kontra Violénsia Doméstika.

Bazeia ba faktu provadu no sirkunstánsia agravante no atenuante sira hosi kazu ne'e, tribunál konklui prosesu ne'e no kondena arguidu ho pena prizaun tinan 3 suspende ba tinan 3, selu mós kustus judisiariu US\$50.

19. Krime maus tratus ba minór - Nú. Prosesu: 19/14. TDDIL

Kompozisaun Tribunál : Koletivu
Juis : Dr. José Maria de Araujo (representa juis koletivu)
Ministériu Públiku : Dr. Vicente Brito
Defeza : Dr. Manuel Sarmiento (defensoria públiku)
Konkluzau : Kondena ho pena prizaun tinan 1

Iha 12 Feveiru 2015, Tribunál Distritál Dili prejide leitura akordaun no kondena arguida POdS ho pena prizaun tinan 1 tanbá provadu komete krime maus tratus ba minór hasoru nia oan fetu, iha Distritu Dili.

Antes ne'e, ministériu públiku akuza arguida kontra artigu 155 Kódigu Penál kona- ba krime maus tratus ba minór. Maibé depoizde avaliasaun ba faktus hotu, tribunál altera hosi krime maus tratus ba menór ba fali krime ofensa ba integridade fízika simples iha artigu 145 Kódigu Penál. Tribunál konsidera katak arguida nia hahalok ne'e la afeita kanek todan ba lezada nia isin, tanbá kazu ne'e akontese kleur ona no arguida no lezada agora dadaun hela tiha iha Indonezia.

Bazeia ba faktus provadu no sirkunstansia ne'ebé asosiadu ho krime ne'e, liuliu sirkunstansia agravante sira hanesan arguida la kolabora ho tribunál, arguida agora dadauk hela tiha ona iha Indonézia, tribunál konklui kondena arguida ho pena prizaun tinan 1.

Julgamentu ba kazu ne'e realiza sem prezensa arguida no lezada nian tanbá sira ba tiha Indonezia.

20. Krime ofensa ba integridade fízika simples ho natureza violénsia doméstika - Nú. Prosesu: 93/14. TDDIL

Kompozisaun tribunál : Singular
Juis : Dr. José Maria de Araújo
Ministériu Públiku : Dr. Matias Soares
Defeza : Dr. Umberto da Silva (defensoria públiku estajiádu)
Konkluzau : Kondena ho pena prizaun tinan 2 suspende ba tinan 3

Iha 16 Feveiru 2015, Tribunál Distritál Dili prejide leitura sentensa no kondena arguidu AdD ho pena prizaun tinan 2 suspende ba tinan 3 tanbá provadu komete krime violénsia doméstika hasoru nia feen, iha Distritu Dili.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu inisiu tribunál prova katak iha 12 Jullu 2014, arguidu basa dala rua iha lezada nia hasan no tuku dala ida iha ulun, nune'e rezulta moras no mean iha hasan no ulun. Faktu provadu sira ne'e produs bazeia ba konfisaun arguidu nian no depoimentu hosi ba lezada.

Bazeia ba faktus provadu ne'ebé produs no sirkunstansia atenuante arguidu nian hanesan konfesa faktu sira no arepende ba nia hahalok, foin premeiraves komete krime, diak malu ona ho lezada no responsabiliza ba nia familia, tribunál konklui prosesu ne'e no kondena arguidu ho pena prizaun tinan 2 suspende ba tinan 3.

21. Krime ofensa ba integridade fízika simples ho natureza violénsia doméstika - Nú. Prosesu: 0269/14. TDDIL

Kompozisaun tribunál	: Singular
Juis	: Dr. José Maria de Araújo
Ministériu Públiku	: Dra. Ivonia Maria Guterres no Dr. Pedro Babtista
Defeza	: Dr. Marçal Mascarinhas (defensória públiku)
Konkluzau	: Sei kontinua prosesu

Iha 17 Fevereiru 2015, Tribunál Distritál Dili julga arguidu SdC ne'ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 20 Jullu 2014, arguidu tuku dala lima iha lezada nia kabas no baku lezada nia ulun ba parede. Aktu ne'e rezulta hetan moras no bubu iha lezada nia kabas no ulun.

Kazu ne'e akontese tanba depoisde lori fila lezada husi festa ne'ebé sira partisipa, no sem koñesementu lezada nian arguidu ba fila fali festa no fila mai toba iha liur. Tanba ne'e mak wainhira lezada ba fanu arguidu, maibe ho hirus arguidu komete aktu sira ne'e hasoru lezada.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 alinea b Lei Kontra Violénsia Doméstika.

Iha julgamentu, arguidu konfesa integralmente faktus hosi akuzasaun, arepende ba nia hahalok no promete sei la komete tan aktu hanesan hasoru lezada no ba ema seluk iha futuru. Arguidu mós deklara katak depoisde akotesementu ne'e sira diak malu fali.

Lezada konfirma katak arguidu tuku dala lima iha nia kabas no kaer nia ulun baku ba parede. Maske nune'e, lezada deklara katak sira diak malu ona no fó ona perdaun ba arguidu.

Iha alegasaun finál, ministériu públiku konsidera katak faktu hotu-hotu iha akuzasaun provadu tuir konfisaun arguidu nian, tanba ne'e husu ba tribunál atu kondena arguidu ho pena multa.

Defeza husu ba tribunál atu konsidera sirkunstansia atenuante arguidu nian hanesan konfesa, arepende ba nia hahalok, diak malu ona ho lezada no responsabiliza ba nia familia, nune'e husu ba tribunál atu fó pena ne'ebé kmaan.

Depoisde rona tiha alegasaun husi parte sira, tribunál marka fali agenda julgamentu ba leitura sentensa iha 27 Feveiru 2015 tuku 3 lokraik.

22. Krime ofensa ba integridade física simples ho natureza violência doméstica - Nú. Prosesu: 1071/14. TDDIL

Kompozisaun tribunál : Singular
Juis : Dr. José Maria de Araujo
Ministériu Públiku : Dra. Ivonia Maria Guterres no Dr. Napoleao da Silva
Defeza : Dr. José da Silva (defensoria públiku)
Konkluzau : Kondena ho pena prizaun tinan 1 fulan 6 suspende ba tinan 2

Iha 18 Feveiru 2015, Tribunál Distritál Dili realiza julgamentu movel iha Komando Polisia Distritu Liquiça no julga arguidu JdSG ne'ebé komete krime violência doméstica hasoru nia feen, iha Distritu Liquiça.

Ministériu Públiku akuza katak iha 20 Maiu 2014, arguidu tuku dala tolu iha lezada nia kotuk laran, basa iha hasan parte loos, buti iha kakorok no rasta lezada nia fuuk too lezada monu ba iha rai. Aktu ne'e rezulta lezada sofre bubu no moras iha lezada nia kotuk laran, hasan no hirusmatan. Kazu ne'e akontese tanbá lezada soe tiha arguidu nia arloji (*jam tangan*) tanba wainhira lezada haruka arguidu hein labarik atu lezada fase ropa maibé arguidu lakohi.

Ministériu Públiku akuza arguidu kontra artigu 145 Kódigu Penál kona-bá krime ofensa ba integridade física simples konjuga ho artigu 35 Lei Kontra Violência Doméstica.

Iha julgamentu ne'e arguidu uza nia direitu nonok. Enkuantu lezada kontinua mantein faktus iha akuzasaun katak arguidu basa iha hasan, tuku dala 3 iha kotuk laran no rasta lezada nia fuuk too lezada monu ba rai.

Iha alegasaun finál, ministériu públiku konsidera faktus sira iha akuzasaun provadu tuir depoimentu lezada nian no deklarasaun arguidu durante inkeritu iha ministériu públiku. Bazeia ba faktu provadu ne'e, ministériu públiku husu ba tribunál atu kondena arguidu ho pena prizaun tinan 1 fulan 6 no suspende ba tinan 3. Iha parte seluk, defeza husu ba tribunál atu kondena arguidu ho pena admoestasaun.

Depoisde rona tiha alegasaun husi parte sira, tribunál konklui prosesu ne'e no kondena arguidu ho pena prizaun tinan 1 fulan 6 no suspende ba tinan 2.

23. Krime ofensa ba integridade física simples ho natureza violência doméstica - Nú. Prosesu: 0072/14. TDDIL

Kompozisaun tribunál : Singular
Juis : Dra. Francisca Cabral
Ministériu Públiku : Dra. Ivonia Maria Guterres
Defeza : Dr. Laurindo Cesar Moreirra (advogado estajiádu)
Konkluzau : Sei kontinua prosesu

Iha 20 Feveiru 2015, Tribunál Distritál Dili julga arguidu GFS ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 14 Marsu 2014, arguidu buti lezada nia kakorok no hodi liman taa dala rua iha lezada nia kakorok. Aktu ne`e rezulta lezada sofre moras no bubu iha nia kakorok. Kazu ne`e akontese tanba arguidu husu ba lezada atu hola tan feto seluk, maibé lezada lakohi.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples kónjuga ho artigu 35 Lei Kontra Violénsia Doméstika.

Iha julgamentu arguidu nega faktus no deklarasaun katak nia la baku lezada maibé lezada rasik mak sente moe no halai hosi uma to`o agora la fila ba uma tanbá wainhira arguidu sai hosi prizaun lezada isin rua ona ba mane seluk.

Hafoin rona tiha deklarasaun hosi arguidu, tribunál suspende audiénsia no marka fali ba iha 26 Feveiru 2015, iha tuku 2 lokraik hodi rona tan testamuña seluk tanbá tribunál seidak hetan lezada nia hela fatin atu notifika.

Iha 26 Feveiru 2015, tribunál kontinua adia julgamentu ba 2 Marsu 2015 iha tuku 11:00 dadersan tanbá tribunál mós la hetan testamuña ninia hela fatin hodi notifika mai tuir julgamentu.

24. Krime violasaun seksuál-Nú. Prosesu 0540/12. TDDIL

Kompozisaun tribunál : Singular
Juis : Dr. Antonio Helder do Carmo
: Dra. Jumiaty Freitas
: Dr. Naarsson M. B. Sarmiento (juis estajiádu)
Ministériu Públiku : Dr. Matias Soares
Defeza : La marka prezensa
Konkluzau : Adia

Iha 20 Feveiru 2015, Tribunál Distritál Dili adia julgamentu ba krime violasaun seksuál ne`ebé komete hosi arguidu HMM, iha Distritu Ermera. Anunsia kona-ba adiamentu ne`e liuhosi julgamentu movel iha Ermera.

Tribunál adia julgamentu ba iha 15 Juñu 2015 tanbá arguidu no lezada la kumpri notifikasaun tribunál hodi tuir julgamentu. Kazu ne`e tribunál adia sem prezensa defeza nian.

25. Krime ofensa ba integridade fízika simples ho natureza violénsia doméstika - Nú. Prosesu: 1176/14. TDDIL

Kompozisaun tribunál : Singular
Juis : Dra. Jumiaty Freitas
Ministériu Públiku : Dr. Pedro Babtista
: Dr. Ricardo Lito(ministériu públiku estajiáriu)
Defeza : Dra. Agustinha de Oliveira (defensória públiku estajiáriu)
Konkluzau : Sei kontinua prosesu

Iha 26 Fevereiru 2015, Tribunál Distritál Dili julga arguidu JM ne`ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 29 Setembru 2012, arguidu hodi pasta baku iha lezada nia kanuruk nune'e tudik ne'ebé arguidu rai iha pasta laran kona iha lezada nia kanuruk no kauza kanek no ran-sai. Motivu hosi akontesementu ne'e tanbá arguidu deskonfia lezada ba mane seluk.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples kónjuga ho artigu 35 Lei Kontra Violénsia Doméstika.

Iha tribunál arguidu deklara katak faktus ne'ebé Ministériu Públiku akuza ba nia ne'e balun loos no balun la loos. Arguidu deklara katak nia fóti pasta atu ba servisu fatin maibé lezada mak tenta rasta no hadau pasta refere hosi arguidu no lezada nia ulun kona espelu ne'ebé tara hela iha didin lolon nune'e monu kona iha lezada nia kanuruk no rezulta kanek.

Enkuantu lezada deklara katak arguidu sempre deskonfia lezada bainhira lezada fila tarde hosi servisu fatin. Iha loron refere arguidu diskuti-malu ho lezada no hodi pasta baku iha lezada nia kanuruk, nune'e tudik ne'ebé arguidu tau iha pasta kona iha lezada nia kanuruk no rezulta kanek. Hafoin akontesementu ne'e arguidu no lezada hela separadu.

Iha alegasaun finál, ministériu públiku konsidera faktus hotu provadu tuir depoimentu hosi lezada makse arguidu nega faktu sira iha akuzasaun. Tanba ne'e, ministériu públiku husu ba tribunál atu kondena arguidu ho pena prizaun tinan 2 suspende ba tinan 2 fulan 6.

Defeza husu ba tribunál atu fó kastigu ne'ebé kmaan tanbá mesmu antes ne'e sira iha problema maibé depoisde akontesementu arguidu ho intensaun diak ba buka fali lezada atu diak malu maibé lezada mak la kohi ona.

Depoisde rona tiha alegasaun husi parte sira, tribunál marka fali agenda julgamentu ba leitura sentensa iha 6 Marsu 2015 iha tuku 15:00 lorokraik.

26. Krime ofensa ba integridade fízika simples ho natureza violénsia doméstika - Nú. Prosesu: 1310/14. TDDIL

Kompozisaun tribunál : Singular
Juis : Dra. Jumiaty Freitas
Ministériu Públiku : Dr. Osorio de Deus no Dra. Ivonia Maria Guterres
Defeza : Dr. José da Silva (defensoria pública)
Konkluzau : Kondena ho pena prizaun fulan 6 suspende ba tinan 1.

Iha 27 Feveireiru 2015, Tribunál Distritál Dili liu hosi julgamentu movel iha Distritu Liquica julga arguidu MQ ne`ebé komete krime violénsia doméstika hasoru nia inan, iha Distritu Likísa.

Ministériu Públiku akuza katak iha 30 Abril 2014, arguidu kaer lezada nia faru gola rasta ba mai no tuku dala rua iha lezada nia ulun. Aktu ne`e rezulta lezada sofre moras iha lezada nia kakorok no ulun. Kazu ne`e akontese tanbá lezada halo juramentu marka rai ba nia be-oan tanba lezada husu nia be-oan katak nia mak baku nia alin maibé nia be-oan nega.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples kónjuga ho artigu 35 Lei Kontra Violénsia Doméstika.

Iha tribunál arguidu konfesa integralmente faktu sira hosi akuzasaun, hatudu nia arependementu, no deklara katak arguidu husu ona deskulpa ba lezada no fó ona fahi ida no tais ida ba lezada.

Alende ne`e, lezada konfirma katak arguidu husu ona deskulpa no fó sala fahi ida no tais ida ba lezada.

Iha alegasaun finál, ministériu públiku husu ba tribunál atu konsidera sirkunstansia atenuante arguidu nian. Maske nune`e atu halo prevensaun jeral ba aktu hanesan labelle akontese tan iha futuro, husu ba tribunál atu kondena arguidu ho pena prizaun tinan 1 suspende ba tinan 2.

Defeza husu ba tribunál atu fó kastigu ne`ebé kmaan tanbá arguidu konfesa, arepende ba nia hahalok, husu ona deskulpa ba nia inan no responsabiliza ba familia.

Depoizde rona tiha alegasaun husi parte sira, tribunál imediatamente tribunál konklui prosesu ne`e no kondena arguidu ho pena prizaun fulan 6 suspende ba tinan 1.

27. Krime ofensa ba integridade física simples ho natureza violénsia doméstika - Nú. Prosesu: 005/14. PDDIL

Kompozisaun tribunál : Singular
Juis : Dra. Jumiaty Freitas
Ministériu Públiku : Dr. Osorio de Deus (prokurador estajiáriu)
 : Dra. Ivonia Guterres
Defeza : Dr. José da Silva (defensoria pública)
Konkluzau : Kondena ho pena prizaun tinan 1 suspende ba tinan 2

Iha 27 Feveireiru 2015, Tribunál Distritál Dili, julga arguidu DdS ne`ebé komete krime violénsia doméstika hasoru nia feen, iha Distritu Liquica.

Ministériu Públiku akuza katak iha 4 Janeiru 2014, arguidu tuku dala rua iha lezada nia kotuk laran too lezada monu ba rai. Aleinde ne'e, arguidu tuku dala ida iha lezada nia ren-toos no dala ida iha hirus-matan. Aktu ne'e rezulta lezada sofre bubu no moras iha lezada nia kotuk laran, ren-toos no hirus-matan.

Kazu ne'e akontese tanba lezada dehan ba arguidu kous sira nia oan atu lezada ba ku'u modo meudia nian maibe arguidu lakohi no ba fali joga biliar.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples kónjuga ho artigu 35 Lei Kontra Violénsia Doméstika.

Hafoin lezada hato'o keixa iha polísia, polísia sira lori kedas lezada ba halo tratamentu iha sentru Saúde Likísa.

Iha tribunál, arguidu nega faktu balun katak arguidu basa deit dala rua iha lezada nia hasan no lezada atu halai mak monu rasik ba rai. Arguidu mós deklara katak nia la tuku iha lezada nia kotuk laran, ren-toos no hirus-matan.

Depoide tribunál konfirma fali ho lezada no lezada deklara katak arguidu tuku dala rua iha lezada nia ren-toos no dala ida iha hirus-matan. Maibe relasiona ho bubu ne'ebé lezada hetan nia iha nia kotuk laran, ne'e tanba monu no baku ba iha fatuk leten mak kauza hetan bubu ne'e.

Iha alegasaun finál, ministériu públiku husu ba tribunál atu kondena arguidu ho pena prizaun tinan 1 suspende ba tinan 2 tanbá arguidu provadu komete krime hasoru lezada no tanbá arguidu nega faktus hosi akuzasaun.

Defeza husu ba tribunál atu kondena arguidu ho pena admoestasaun tanbá arguidu premeiravez komete krime, arepende ba nia hahalok no responsabiliza ba familia.

Depoide alegasaun husi parte sira, tribunál konklui kedas prosesu ne'e no kondena arguidu ho pena prizaun tinan 1 suspende ba tinan 2 ho dever adisonál apresentaan ba iha xefe suku fulan ida dala ida durante fulan 6 nia laran.

28. Krime ofensa ba integridade física simples ho natureza violénsia doméstika - Nú. Prosesu: 0005/14. DIATR/337/14.TDDIL

Kompozisaun tribunál : Singular
Juis : Dr. José Maria de Araújo
Ministériu Públiku : Dra. Remizia de Fatima
Defeza : Dr. Rui Guterres (defensória públiku)
Konkluzaan : Adia

Iha 19 Feveireiru 2015, Tribunál Distritál Dili adia julgamentu ba krime violénsia doméstika ne'ebé involve arguidu FdA hasoru nia feen, iha Distritu Dili.

Kazu ne'e adia tanba lezada la kompri notifikasaun no tribunál marka fali iha 24 April 2015, iha tuku 10:30 dadersan.

29. Krime ofensa ba integridade fízika simples ho natureza violénsia doméstika - Nú. Prosesu: 0186/14. ERERM/1341/14.TDDIL

Kompozisaun tribunál : Singular
Juis : Dr. Antonino Helder do Carmo
Ministériu Públiku : Dra. Remizia de Fatima da Silva
Defeza : Dr. Fransisco Caitano Martins (defensória públiku estajiádu)
Konkluzau : Sei kontinua prosesu

Iha 23 Feveireiru 2015, Tribunál Distritál Dili julga arguidu BS ne'ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 17 Setembru 2014, arguidu tuku dala rua iha lezada nia kotuk laran to'o lezada monu ba rai. Aleinde ne'e arguidu tebe dala rua iha lezada tilun. Motivu husi akontesementu ne'e arguidu ho lezada diskuti-malu wainhira arguidu husu tuir kona-ba aifunan iha vazú ne'ebé la iha nia fatin (lakon).

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa integralmente faktus husi akuzasaun, arepende nia hahalok no promete sei la komete tan krime hanesan iha futuru. Tanba arguidu konfesa integralmente faktus iha akuzasaun, ministériu públiku husu atu la rona tan depoimentu lezada.

Iha alegasaun finál, ministeriu públiku konsidera katak tanba faktu hotu-hotu provadu tuir konfisaun husi arguidu nian, nune'e atu halo prevensaun jerál iha futuru, husu ba tribunál kondena arguidu ho pena multa US\$120. Iha parte seluk, defeza husu atu tribunál fó pena ne'ebé adekua ba arguidu.

Depoizde rona tiha alegasaun husi parte, tribunál marka fali julgamentu ba leitura sentensa iha 13 Marsu 2015 iha tuku 11:00 dadersan.

30. Krime ofensa ba integridade fízika simples ho natureza violénsia doméstika - Nú. Prosesu: 0043/13. PDDIL/1081/14.TDDIL

Kompozisaun tribunál : Singular
Juis : Dra. Ana Paula Fónseca
Ministériu Públiku : Dr. Reinato bere nahak
Defeza : Dr. Humberto Alves (defensória públiku estajiádu)
Konkluzau : Kondena ho pena prizaun fulan 10 suspende ba tinan 2

Iha 23 Feveiriu 2015, Tribunál Distritál Dili julga arguidu AdS ne`ebé komete krime violénsia doméstika hasoru nia feen, iha Distritu Liquisa.

Ministériu Públiku akuza katak iha 10 Janeiru 2013, arguidu basa dala rua iha lezada nia hasan, no tuku dala ida iha kanuruk to'o monu ba rai. Kazu ne`e akontese tanba arguidu ho lezada diskute malu kona-ba osan kios nian ne`ebé arguidu atu sosa fali sasan kios nian, maibe lezada husu atu rai tiha balu, tanba lezada nia avo moras todan.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu konfesa integralmente faktu sira husi akuzasaun, arepende nia hahalok no promete sei la komete tan krime hanesan iha futuru.

Tanba arguidu konfesa integralmente faktu sira iha akuzasaun, ministériu públiku husu atu la rona tan depoimentu hosi lezada.

Iha alegasaun finál, ministériu públiku konsidera katak faktu hotu-hotu provadu tuir konfisaun arguidu nian, nune`e, atu halo pevensaan jeral iha futuru, husu ba tribunál atu kondena arguidu ho pena prizaun tinan 1 suspende ba tinan 2.

Iha parte seluk, defeza haktuir katak arguidu konfesa, arepende nia hahalok, responsabiliza ba familia, tanba ne`e husu ba tribunál atu absolve arguidu husi.

Depoisde rona tiha alegasaun husi parte sira, tribunál konklui kedas prosesu ne`e, no kondena arguidu ho pena prizaun fulan 10 suspende ba tinan 2.

31. Krime violasaun seksuál – Nú. Prosesu: 515/14.TDDIL

Kompozisaun tribunál	: Koletivu
Juis	: Dr. José maria de araujo, : Dra. Fransisca Cabral : Dra. Albertina Neves (juis estajiádu)
Ministériu Públiku	: Dr. Vicente Britos
Defeza	: Dr. Cansio Xavier (defensória públiku)
Konkluzaan	: Adia

Iha 23 Feveiriu 2015, Tribunál Distritál Dili adia julgamentu ba krime violasaun seksuál ne`ebé involve arguidu SX hasoru TL, tanba arguidu la kumpri notifikasaun. Alende ne`e, tribunál la bele notifika lezada tanba la hetan nia hela fatin.

Relasiona ho impedimentu ne`e, tribunál adia fali ba 26 Maiu 2015, iha tuku 9:00 dadersan. Tribunál mós deklara katak sei kondena arguidu ho multa kuandu arguidu la justifika nia falta

iha loron lima nia laran no sei hatun mandadu detensaun atu aseguara arguidu nia prezensa iha julgamentu.

32. Krime abuzu seksuál ba menór -Nú. Prosesu: 1175/14.TDDL

Kompozisaun tribunál : Koletivu
Juis : Dra. Francisca Cabral (representa juis koletivu)
Ministériu Públiku : Dra. Benvinda da Costa do Rosario
Defeza : Dr. Manuel Lito Exsposto (defensória públiku)
Konkluzau : Adia

Iha 25 Feveiru 2015, Tribunál Distritál Dili adia julgamentu ba krime abuzu seksuál ba menór ne'ebé involve arguidu MSI hasoru AFdN, iha Distritu Dili.

Kazu ne'e adia sein data fiksi tanba tribunál sei halo distribusaun foun ba juis seluk, tanba juis ne'ebé kaer prosesu ne'e sei iha relasaun familia ho arguidu.

33. Kazu krime violasaun seksuál -Nú. Prosesu:1110/14.TDDIL

Kompozisaun tribunál : Koletivu
Juis : Dr. Jose Maria de Araújo (representa juis koletivu)
Ministériu Públiku : Dr. Vicente Britos
Defeza : Dr. Albino Pereira. (defensória públiku estajiáriu)
Konkluzau : Adia

Iha 25 Feveiru 2015, Tribunál Distritál Dili adia julgamentu ba krime abuzu seksuál ba menór ne'ebé involve arguidu MSI hasoru vitima AFdN.

Julgamentu ba kazu ne'e adia sein data fiksi tanba tribunal sei halo distribusaun foun ba juis sira seluk, tanba juis ne'ebe kaer prosesu ne'e sei iha relasaun familia ho arguidu.

34. Krime ofensa ba integridade física simples ho natureza violénsia doméstika - Nú. Prosesu 2034/11.PDDIL/114/14.TDDIL

Kompozisaun tribunál : Singular
Juis : Dra . Jacinta Correia
Ministériu Públiku : Dr. Benvinda do Rosario
Defeza : Dr. Fransisco (defensória públiku estajiáriu)
Konkluzau : Sei kontinua prosesu

Iha 26 Feveiru 2015, Tribunál Distritál Dili, julga arguidu HM ne'ebé komete krime violénsia doméstika hasoru nia feen, iha Distritu Dili.

Ministériu Públiku akuza katak iha 30 Juñu 2011, maizumenus iha tuku 03:00 madrugada, arguidu basa dala rua iha lezada nia hasan no buti iha lezada nia kakorok no riba ba kama leten.

Kazu ne'e akontese tanba arguidu ba halimar game iha viziñu nia uma to'o dadersan madrugada no la fila ba uma. Tanba ne'e wainhira lezada ba bolu mak arguidu hirus no komete aktu hirak ne'e.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál, arguidu deklara katak, faktu sira iha akuzasaun ne'e laloos. Kazu ne'e akontese la'os iha tuku 03:00 madrugada maibé akontese iha tuku 10:00 kalan, arguidu ba hare nia alin halimar hela game, la kleur lezada ba hakilar trata-at arguidu no lori fatuk tuda arguidu. Arguidu sente moe no hakuak lezada lori ba uma, to'o iha kuartu laran lezada tata tan arguidu nia kakorok, hodi halo arguidu dudu vítima ba kama leten.

Depoisde rona tiha deklarasaun husi arguidu, tribunál bolu lezada atu konfirma faktus sira akuzasaun no lezada haktuir katak, faktus sira iha akuzasaun ne'e loos, arguidu basa dala rua no buti iha kakorok riba ba kama leten.

Iha alegasaun finál, ministériu públiku konsidera katak maske arguidu nega faktu hotu iha akuzasaun maibe faktu hotu-hotu provadu bazeia ba konfirmasaun husi lezada. Tanba ne'e atu halo prevensaun jeral husu ba tribunál atu kondena arguidu ho pena prizaun tinan 2 suspende ba tinan 2.

Defeza haktuir katak bazea ba deklarasaun arguidu nian hatu'o katak, arguidu la basa no la buti iha lezada nia kakorok no riba ba kama leten, maibé lezada mak lori fatuk tuda arguidu mesmu la kona, lezada mak tata arguidu nia kabas no arguidu la iha intensaun atu dudu lezada ba kama leten. La iha relatoriu mediku no testamuña atu reforsa akuzasaun, tanba ne'e husu ba tribunál atu absolve arguidu husi krime ne'e.

Depoisde rona tiha alegasaun husi parte sira, tribunál marka fali agenda julgamentu ba leitura sentensa iha 6 Marsu 2015, tuku 14:00 lokoraik.

35. Krime ofensa ba integridade fízika simples ho natureza violénsia doméstika- Nú. Prosesu: 0318/12.PDDIL/409/2014/PDDIL

Kompozisaun tribunál	: Singular
Juis	: Dra. Francisca Cabral
Ministériu Públiku	: Dra. Bemvinda da Costa do Rozario
Defeza	: Dr. Cansio Xavier (defensoria públiku)
Konkluzau	: Adia

Iha 10 Fevereiru 2015, Tribunál Distritál Dili adia julgamentu ba kazu krime violénsia doméstika ne'ebé involve arguidu ABG hasoru nia feen, iha Distritu Dili.

Kazu adia sein data fiksi, tanbá notifikasaun ne'ebé tribunál haruka liuhosi polisia, maibe polisia la konsege indetifika arguidu no lezada ninia hela fatin.

36. Krime maus tratus ba kónjuje - Núc. Prosesu: 0066/13.DICMR

Kompozisaun tribunál : Koletivu
: Dra. Fansisca Cabral
: Dr. José Maria de Arajo.
: Dra. Albertina Neves (juis estajiáriu)
Ministériu Públiku : Dr. Matias Soares
Defeza : Dr. Manuel Lito Exposto (defensória públiku)
Konkluzau : Sei kontinua prosesu

Iha 23 Fevereiru Tribunál Distritál Dili hala' o julgamentu ba kazu maus tratus ba kónjuje ne'ebé involve arguidu PL hasoru nia feen, iha Distritu Dili.

Ministériu Públiku akuza katak iha 23 Fevereiru 2013, arguidu tuku no basa dala tolu iha lezada nia hasan parte loos no karuk, tuku dala tolu iha kabas no tuku mós dala rua iha kotuk laran. Kazu ne'e akontese tanba arguidu ba joga karta no halo osan lakon hotu.

Tuir-mai iha 6 Marsu 2013, arguidu basa dala rua iha lezada nia hasan, tebe dala rua iha kotuk laran no dala rua iha hirus-matan. Motivu husi akontesementu ne'e tanba lezada haruka arguidu fase ropa maibe arguidu la kohi.

Ministériu Públiku akuza arguidu kontra artigu 154 Kódigu Penál kona-ba maus tratus ba kónjuje konjuga ho artigu 35 Lei Kontra Violénsia Doméstika.

Iha tribunál, arguidu deklara katak, faktu sira iha akuzasaun ne'e la loos, tanba arguidu la basa no la tuku lezada, maibe lezada mak sempre hirus arguidu. Aleinde ne'e, relasiona ho kazu segundu, arguidu mós nega katak nia tebe no basa lezada, maibé lezada mak dada arguidu nia orgaun jenitál (alat kelamin), no nia buka atu salva-aan hodi tebe lezada para lezada bele husik nia orgaun sensitivu.

Tanba ne'e, tribunál konfirma fali ho lezada no lezada deklara katak problema sira ne'e sempre akontese tanba deit lingua, arguidu koalia uza lian Inglês no lezada koalia ho Tétun. Dala ruma arguidu koalia lezada mós la hatene arguidu koalia saida. Maske nune'e, arguidu mós deklara katak nia arepende ninia hahalok, fóin premeiraves komete krime no promete sei la komete tan krime hanesan hasoru lezada iha futuru.

Iha alegasaun finál, ministériu públiku mantein ho ninia akuzasaun no husu ba tribunal atu kondena arguidu ho pena prizaun tinan 3 suspende ba tinan 4.

Iha parte seluk, defeza haktuir katak arguidu rejeita katak akuzasaun ne'e la loos no arguidu deklara katak arguidu nunka baku lezada. Faktu ne'ebé loos mak wainhira arguidu tebe lezada atu ses-an hosi atake ne'ebé lezada halo ba nia orgaun jenitál. Tanba ne'e mak arguidu tebe para

lezada bele husik arguidu no iha momentu ne`eba arguidu kous hela bebe. Bazeia faktu hirak ne`e, husu ba tribunal atu absolve arguidu husi krime ne`e.

Depoisde rona tiha alegasaun husi parte sira, tribunál marka fali agenda julgamentu ba leitura akordaun iha 3 Marsu 2015, tuku 15:00 loraik.

37. Kazu krime ofensa ba integridade fízika simples ho natureza violénsia doméstika Nú. Prosesu: 239/pen/14/TDS.

Kompozisaun tribunál : Singular
Juis : Dr. Eusébio Xavier Victor (juis estajiáriu)
Ministériu Públiku : Dr. Jose Ello
Defeza : Dr. Joao Henrique de Carvalho (defensoria públiku)
Konkluzau : Kondena ho pena prizaun fulan 2 suspende ba tinan 1

Iha 25 Fevereiru 2015, Tribunál Distritál Suai realiza julgamentu movél iha Distritu Maliana, no julga kazu violénsia doméstika ne`ebé involve arguidu SB hasoru nia feen, iha Distritu Bobonaro.

Ministériu Públiku akuza katak iha 25 Agosto 2014, maizumenus iha tuku 02:00 dadersan, arguidu basa dala 3 iha lezada nia hasan karuk, buti iha kakorok, rakut iha fuuk no riba tun ba rai. Kazu ne`e akontese tanba wainhira arguidu fila husi mate uma kalan boot no lezada husu-tuir kona-ba arguidu fila kalan boot ne`e.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Iha julgamentu arguidu konfesa ba faktus hotu iha akuzasaun, arguidu mós deklara katak depoisde akontesimentu sira diak malu fali.

Alende ne`e, wainhira tribunál husu fali ba lezada, no lezada kontinua mantein faktu sira iha akuzasaun ministériu públiku nian.

Iha alegasaun finál, ministériu públiku hare katak arguidu konfesa faktus hotu ne`ebé mak konsta iha akuzasaun, nune`e, husu ba tribunál atu kondena arguidu ho pena prizaun fulan 6 suspende ba tinan 1.

Iha parte seluk defeza argumenta katak arguidu konfesa, foin primeiraves komete krime no arguidu hatudu nia arependimentu, tanba ne`e husu ba tribunál atu aplika pena admoestrasaun ba arguidu.

Depoisde rona tiha alegasaun husi parte sira no bezeia ba faktus hotu ne`ebé mak produs iha julgamentu, tribunál konklui prosesu ne`e no kondena arguidu ho pena prizaun fulan 6 suspende ba tinan 1.

38. Kazu krime ofensa ba integridade fizika simples ho natureza violénsia doméstika - Nú. Prosesu: 197/pen/14/TDS.

Kompozisaun tribunál : Singular
Juis : Dr. Álvaro Maria Freitas
Ministériu Públiku : Dr. Jose Ello
Defeza : Dr. João Henrique de Carvalho (defensoria públiku)
Konkluzau : Kondena ho pena prizaun fulan 2 suspende ba tinan 1

Iha 25 Feveiru 2015, Tribunál Distritál Suai liu husi julgamentu movél iha Distritu Bobonaro, julga arguidu AP ne'ebé komete krime violénsia doméstika hasoru nia feen, iha Distritu Bobonaro.

Ministériu Públiku akuza katak iha loron 13 Juñu 2013, arguidu tuku dala rua iha lezada nia ulun, buti iha lezada nia kakorok no hanehan lezada ba rai. Kazu ne'e akontese tanba wainhira lezada konvida arguidu atu ba han hamutuk ho padre sira arguidu lakohi, tanba ne'e mak sira diskute malu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu, arguidu hili direitu nonok maibe wainhira tribunál husu fali lezada no lezada konfirma katak faktus iha akuzasaun loos hotu. Mesmu nune'e, lezada deklarara katak sira iha ona akordu dame entre arguidu ho lezada.

Iha alegasaun finál, ministériu públiku haktuir katak maske arguidu hili direitu nonok maibé liu husi deklarasaun lezada nian hatudu katak ba faktu hotu provadu, tanba ne'e husu ba tribunál atu aplika pena prizaun fulan 6 suspende ba tinan 1 fulan 6.

Iha parte seluk defeza hare katak arguidu diak malu ona, fóin primeiraves komete krime, husu ba tribunál atu aplika pena ne'ebé justu no adekua ba arguidu.

Depoizde rona tiha alegasaun husi parte sira, tribunál konklui prosesu ne'e no kondena arguidu ho pena prizaun fulan 2 suspende ba tinan 1.

39. Krime ofensa ba integridade fizika simples ho natureza violénsia doméstika - Nú. Prosesu: 202/pen/14/TDS.

Kompozisaun tribunál : Singular
Juis : Dr. Álvaro Maria Freitas
Ministériu Públiku : Dr. Jose Ello
Defeza : Dr. Joao Henrique de Carvalho (defensoria pública)
Konkluzau : Kondena ho pena multa

Iha 25 Feveireiru 2015, Tribunál Distritál Suai liu husi julgamentu movél iha Distritu Bobonaro, no julga arguidu NdA ne'ebé komete krime violénsia doméstika hasoru nia aman, iha Distritu Bobonaro.

Ministériu Públiku akuza katak iha 20 Setembru 2013, maisumenuz iha tuku 07:00 dader, arguidu lori fatuk tuda iha lezadu nia liman sikun no kauza bubu no moras. Kazu ne'e akontese tanba arguidu diskuti-malu ho viziñu sira kona-ba rai maibé lezadu terinetik dehan lalika buka problema ho ema sira ne'e.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu, arguidu konfesa katak faktus ne'ebé konsta iha akuzasaun ministériu públiku nian ne'e loos hotu. Arguidu mós hatudu nia arependimentu no promete sei la halo tan iha futuru.

Aleinde ne'e, lezadu mós kontinua mantein faktu sira iha akuzasaun, maibe deklarara katak lezadu depoisde problema ne'e akontese sira diak malu to agora.

Iha alegasaun finál, ministériu públiku hare ba faktus sira iha akuzasaun no konfisaun hosi arguidu nian, husu ba tribunál atu aplika pena multa US\$100 no sei selu US\$1.00 kada loron.

Iha parte seluk defeza hare ba sirkunstansia atenuante balu mak hanesan arguidu hatudu nia arependimentu, diak malu ona, foin primeiravez komete krime, no arguidu mak sustenta familia, nune'e, husu ba tribunál atu aplika pena ne'ebé mak justu no adekua ba arguidu.

Depoisde rona tiha alegasaun husi parte sira, tribunál konklui prosesu no imediatamente kondena arguidu ho pena multa US\$100.00. Tribunál mos aplika pena alternativa loron 66 sekarik arguidu la kumpri pena multa.

40. Krime ofensa ba integridade fizika simples ho natureza violénsia doméstika - Nú. Prosesu: 196/pen/14/TDS.

Kompozisaun tribunál	: Singular
Juis	: Dr. Álvaro Maria Freitas
Ministériu Públiku	: Dr. Jose Ello
Defeza	: Dr. João Henrique de Carvalho (defensoria públiku)
Konkluzau	: Kondena ho pena multa

Iha 25 Feveireiru 2015, Tribunál Distritál Suai liu husi tribunál movél iha Distritu Bobonaro, julga arguidu DBL tanba komete krime violénsia doméstika hasoru nia feen, iha Distritu Bobonaro.

Ministériu Públiku akuza katak iha 13 Marsu 2014, arguidu ho lezada diskutimalu tanba arguidu empresta ema nia osan \$.50.00 ne'ebé sedauk entrega ba osan na'in hodi ema mai fóti hare karon lima iha natar laran.

Tuir mai iha 20 Marsu 2014, arguidu basa lezada dala rua no tebe dala rua no kauza lezada monu tun ba rai. Aktu ne'e akontese tanba lezada sai husi uma ba festa seim koñesimentu husi arguidu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha audiénsia julgamentu arguidu deklara ba tribunál katak ba faktus sira konsta iha akuzasaun ne'e loos hotu, arguidu mós refórta tan katak depoisde problema sira moris separa to agora tanba arguidu mós iha ona feen kik, maibé arguidu sei hadomi nafatin nia oan sira.

Wainhira tribunál konfirma fali ho lezada no lezada deklara katak oras ne'e sira moris keta-ketak ona.

Iha alegasaun finál, ministériu públiku konsidera faktus hotu-hotu provadu tuir konfisaun arguidu nian, tanba ne'e husu ba tribunál atu aplika pena efektivu fulan 3.

Iha parte seluk defeza hare katak arguidu konfesa ba faktus no arepende ba nia hahalok, nune'e, husu ba tribunál atu aplika pena suspensaun ne'ebé mak justu ba arguidu.

Depoisde rona tiha alegasaun husi parte sira, tribunál konklui prosesu ne'e no kondena arguidu ho pena multa US\$.200 no aplika mós pena alternativu durante lora 136 iha prinzaun sekarik la kumpri pena multa.

41. Krime ofensa ba integridade fizika simples natureza violénsia doméstika Nu. Prosesu: 06/pen/2015/TDS.

Kompozisaun tribunál	: Singular
Juis	: Dr. Álvaro Maria Freitas
Ministériu Públiku	: Dr. Jose Ello
Defeza	: Dr. Joao Henrique de Carvalho (defensoria públiku)
Konkluzau	: Kondena ho pena multa

Iha 25 Feveiru 2015, Tribunál Distritál Suai liu husi tribunál movél hala'o julgamentu ba krime ofensa ba integridade fizika simples hosi arguidu AT hasoru nia inan. Kazu ne'e akontese iha Distritu Bobonaro.

Ministériu Públiku akuza katak iha lora 22 Setembru 2014, maizumenus tuku 08:00 dader, arguidu tuku dala ida iha matan fukun no kauza lezada sente moras. Kazu ne'e akontese wainhira lezada ba fanun arguidu tanba hader tarde.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha audiénsia julgamentu arguidu hili direitu nonok, maibé lezada deklara ba tribunál katak arguidu komete duni krime ne'e. Maske nune'e, depoisde problema arguidu sira rezolve ona no arguidu fó sala tais 1 no fahi 1 ba lezada.

Iha alegasaun final, ministériu públiku konsidera katak maske sira rezolve ona kazu no arguidu hili direitu nonok durante julgamentu, maibe husu ba tribunál atu aplika pena multa US\$40.00 no sei selu \$.1.00 kada loron too kompleta.

Iha parte seluk defeza hare katak arguidu sira rezolve tuir kustume adat nian no fó ona tais 1 no fahi 1, tanba ne'e husu ba tribunál atu aplika pena ne'ebé justu no adekua ba arguidu.

Tribunál konsidera faktus ne'ebé mak konsta iha akuzasaun ministériu públiku provadu hotu, nune'e tribunál konklui prosesu ne'e no kondena arguidu ho pena multa \$.200.00. Wainhira kodenadu la selu pena multa ne'e, alternativamente sei ba kumpri pena prizaun durante loron 136 nia laran.

42. Krime ofensa ba integridade fizika simples ho natureza violénsia doméstika Nú. Prosesu: 184/pen/2014/TDS.

Kompozisaun tribunál	: Singular
Juis	: Dr. Álvaro Maria Freitas
Ministériu Públiku	: Dr. Jose Ello
Defeza	: Dr. Jose do Rego, : Dra. Lorena dos Santos (Advogado Privadu)
Konkluzau	: Kondena ho pena prizaun fulan 1 suspende ba tinan 1

Iha 25 Feveireu 2015, Tribunál Distritál Suai liu husi tribunál movél iha Distritu Bobonaro, julga arguida IL tanba komete krime violénsia doméstika hasoru nia laen, iha Distritu Bobonaro.

Ministériu Públiku akuza katak iha 13 Marsu 2014, arguida tata dala ida iha lezadu nia liman sikun karuk no rakut iha fuuk no kauza lezadu sofre kanek no moras. Kazu ne'e akontese tanba wanhira arguida bolu lezadu atu ba tos maibé lezadu sedauk ba tanba motor nia roda kempes hela sira diskuti malu.

Ministériu Públiku akuza arguida kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu, arguida konfesa ba faktus hotu ne'ebé mak konsta iha akuzasaun no deklarata katak nia arepende ninia hahalok. Tuir deklarasaun lezadu nian katak los duni arguida tata dala ida iha liman.

Iha alegasaun finál, ho referensia ba faktu provadu sira durante julgamentu, ministériu públiku husu ba tribunál atu aplika pena multa US\$60.00 kada loron arguida sei selu US\$1.00.

Iha parte seluk defeze haktuir katak, arguida arepende nia hahalok, foin primeravez komete krime, tanba ne'e husu ba tribunál atu aplika pena ne'ebé mak adekua ba arguida.

Depoisde rona tiha alegasaun husi parte sira, tribunál konklui prosesu ne'e no kondena arguidu ho pena prizaun fulan 1 suspende ba tinan 1.

43. Krime ofensa ba integridade fizika simples ho natureza violénsia doméstika Nu. prosesu. 180/pen/2014/TDS.

Kompozisaun tribunál : Singular
Juis : Dr. Álvaro Maria Freitas
Ministériu Públiku : Dr. Jose Ello
Defeza : Dr. Dr. Jose do Rego,
: Dra. Lorena dos Santos (advogado privadu)
Konkluzau : Kondena ho pena prizaun fulan 1 suspende ba tinan 1

Iha 25 Feveireiru 2015, Tribunál Distritál Suai liu husi tribunál movél hala'o julga arguida SF tanba komete krime violénsia doméstika hasoru nia eis laen, iha Distritu Bobonaro.

Ministériu Públiku akuza katak iha 11 Setembru 2011, maizumenus iha tuku 00:00 kalan, arguida kaer iha lezadu nia faru gola hodi rasta soe tun ba rai rezulta lezadu nia kidan tohar no moras. Kazu ne'e akontese tanba wainhira arguida fila husi to'os, lezadu dehan ba arguida katak mane ida ho inisial 'M' mak hola fali arguida no sei hodi ba nia uma, tanba ne'e mak sira diskute malu.

Ministériu Públiku akuza arguida kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu arguida hili direitu nonok, tribunál atu konfirma deklarasaun husi lezadu nian maibé lezadu mate ona.

Iha alegasaun finál, ministériu públiku haktuir katak maske arguida hili direitu nonok maibé ministériu públiku konsidera faktus sira iha akuzasaun ne'e provadu hotu, nune'e, husu ba tribunál atu aplika pena ne'ebé mak adekuadu ba arguida.

Enkuantu defeza sei duvidas ba iha faktus ne'ebé mak kosta iha akuzasaun ministériu públiku nian tanba laiha relatoriu mediku husi hospital ne'ebé hatudu katak arguidu nia kidan tohar, tanba ne'e husu ba tribunál atu absolve arguida.

Depoide rona tiha alegasaun husi parte sira, tribunál konklui prosesu ne'e kondena arguida ho pena prizaun fulan 1 suspende ba tinan 1

44. Krime ofensa ba integridade fizika simples ho natureza violénsia doméstika-Nú. Prosesu: 198/pen/2014/TDS.

Kompozisaun Tribunál : Singular
Juis : Dr. Álvaro Maria Freitas
Ministériu Públiku : Dr. Jose Ello
Defeza : Dr. João Henrique de Carvalho (defensória públiku)
Konkluzau : Adia

Iha 25 Feveireiru 2015, Tribunál Distritál Suai liu husi tribunál movél iha Distritu Bobonaro, julga arguidu DB ne`ebé komete krime violénsia doméstika hasoru nia feen (LB) no oan (AS), iha Distritu Bobonaro.

Ministériu Públiku akuza katak iha 13 Juñu 2014, arguidu baku dala barak iha lezada AS nia isin lolon kauza bubu no moras. Aktus ne`e akontese tanba lezada fóti osan iha kofre.

Tuir-mai iha 14 Juñu 2014, arguidu basa dala ida iha lezada LB nia reen-toos no kauza moras. Aktus ne`e akontese tanba lezada lori tia nia oan ba halo tratamentu iha ospital sein koñesimentu arguidu.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 3 alinea b no artigu 35 Lei Kontra Violénsia Doméstika.

Iha julgamentu arguidu konfesa integralmente faktu hotu iha akuzasaun, deklara katak diak malu ona ho lezada sira no arepende nia hahalok. Iha parte seluk lezada sira mós deklara ba tribunál katak sira diak malu ona.

Iha alegasaun finál, ministériu públiku haktuir katak arguidu konfesa ba faktus hotu ne`ebé mak konsta iha akuzasaun, nune`e, husu ba tribunál atu aplika pena prizaun tinan 1 suspende ba tinan 2.

Iha parte seluk defeza hare katak arguidu hatudu nia arependementu, konfesa ba faktus hotu, no arguidu mak sustenta familia, nune`e husu ba tribunál atu aplika pena ne`ebé mak justu no adekuardu ba arguidu.

Depoisde rona tiha alegasaun husi parte sira, tribunál marka fali agenda julgamentu ba 4 Marsu 2015, oras tuku 10:00 dader, hodi rona leitura sentensa.

45. Krime ofensa ba integridade fizika simples ho natureza violénsia doméstika -Nú. Prosesu. 181/pen/2014/TDS.

Kompozisaun Tribunál	: Singular
Juis	: Dr. Álvaro Maria Freitas
Ministériu Públiku	: Dr. Jose Ello
Defeza	: Dr. JoaoHenrique de Carvalho (defensória públiku estajiáriu)
Konkluzau	: Kondena ho pena prizaun fulan 4 suspende ba tinan 1

Iha 25 Feveireiru 2015, Tribunál Distritál Suai liu husi tribunál movél Bobonaro julga krime ofensa ba integridade fizika simples ne`ebé komete husi arguidu RM hasoru nia feen, iha Distritu Bobonaro.

Ministériu Públiku akuza katak iha loron 06 Juñu 2013, arguidu tuku dala lima iha lezada nia ulun no dala rua iha kotuk laran no kauza bubu no moras. Kazu ne`e ne`e akontese tanba lezada la prepara hahan kalan nian.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu arguidu hili direitu nonok, maibe wainhira tribunál konfirma fali ho lezada relasiona ho faktu hirak ne'e lezada deklarata katak faktu sira iha akuzasaun ministériu públiku nian loos hotu. Maibe lezada deklarata katak depoisde akontesementu ne'e to agora laiha tan problema.

Iha alegasaun finál, maske arguidu hili direitu nonok, maibe bazeia ba deklarasaun lezada nian hatudu, ministériu públiku husu ba tribunál atu aplika pena prizaun fulan 2 suspende ba tinan 1.

Iha parte seluk defeza hare katak lezada sei hadomi arguidu tanba arguidu mak sustenta familia no sira diak malu ona, tanba ne'e, husu ba tribunál atu aplika pena ne'ebé justu no adekuaudu ba arguidu.

Depoisde rona tiha alegasaun husi parte sira, tribunál konklui prosesu ne'e no kondena arguidu ho pena prizaun fulan 4 suspende ba tinan 1.

46. Krime ofensa ba integridade fizika simples ho natureza violénsia doméstika-Nú. Prosesu: 229/pen/2014/TDS.

Kompozisaun tribunál	: Singular
Juis	: Dr. Costâncio Barros Basmery
Ministériu Públiku	: Dr. Mateus Soares
Defeza	: Dr. Manuel Amaral (defensória públiku)
Konkluzau	: Kondena ho pena prizaun fulan 3 suspende ba tinan 1

Iha 26 Feveireiru 2015, Tribunál Distritál Suai liu husi tribunál movél iha Distritu Bobonaro ,julga arguidu SBC tanba komete krime violénsia doméstika hasoru nia feen, iha Distritu Bobonaro.

Ministériu Públiku akuza katak iha 25 Agostu 2013, arguidu ho lezada diskuti malu kona-ba problema ba arguidu trata no tolok lezada nia inan aman ba asuntu ne'ebé la klaru.

Tuir-mai, iha 02 Setembru 2013, arguidu buti iha lezada nia kakorok riba ba rai no tuku dala ida iha ulun no kauza moras. Kazu ne'e akontese tanba arguidu ho lezada koko rezolve problema kona-ba tolok malu maibé laiha solusaun hodi halo arguidu nervoju.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu, arguidu konfesa ba faktus hotu iha akuzasaun, arguidu mós arepende nia hahalok no diak malu ona ho lezada. Iha parte seluk lezada mós deklarata ba tribunál katak depoisde problema sira diak malu kedas.

Iha alegasaun finál, bazeia ba faktu sira ne'ebé produz durante julgamentu, ministériu públiku husu ba tribunál atu aplika pena admoestrasaun ba arguidu. Defeza mós ho referensia ba sirkunstansia atenuantes sira hanesan arguidu konfesa ba faktus hotu, diak malu ona no fóin primeiravez komete krime, husu ba tribunál atu aplika pena ne'ebé mak la lemiti arguidu nia liberdade.

Depoisde rona tiha alegasaun husi parte sira no depoisde avalia faktu hotu-hotu ne'ebé mak produs iha julgamentu, tribunál konklui prosesu ne'e no kondena arguidu ho pena prizaun fulan 3 suspende ba tinan 1.

47. Krime ofensa ba integridade fizika simples ho natureza violénsia doméstika - Nú. Prosesu: 229/pen/2014/TDS

Kompozisaun tribunál	: Singular
Juis	: Dr. Costâncio Barros Basmery
Ministériu Públiku	: Dr. Mateus Soares
Defeza	: Dr. Manuel Amaral (defensória públiku)
Konkluzau	: Kondena ho pena prizaun fulan 3 suspende ba tinan 1

Iha 26 fevereiru 2015, Tribunál Distritál Suai liuhosi tribunál movél iha Distritu Bobonaro, julga arguidu DBD ne'ebé komete krime violénsia doméstika hasoru nia feen, iha Distritu Bobonaro.

Ministériu Públiku akuza katak iha 23 Setembru 2014, arguidu tuku dala rua iha lezada nia matan fukun, tebe dala ida iha kotuk laran no lori fiu baku dala ida iha kelen no kauza bubu no moras. Kazu ne'e akontese tanba arguidu lori osan ba selu hotu nia deve iha kios, no la sosa hahan.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu, arguidu konfesa ba faktus hotu ne'ebé konsta iha akuzasaun, arepende nia hahalok no deklarata katak sira diak malu ona. Wainhira tribunál husu fali ba lezada no lezada mós deklarata katak depoisde akonteseme sira rezolve ona problema ne'e.

Iha alegasaun finál, ministériu públiku haktuir katak arguidu konfesa ba faktus hotu, arepende ba nia hahalok, nune'e husu ba tribunál atu aplika pena ne'ebé adekua ba arguidu tuir krime ne'ebé nia komete.

Iha parte seluk defeza hare katak arguidu hatudu nia arependimentu, konfesa ba faktus hotu, husu ba tribunál atu aplika pena suspensaun ba arguidu.

Depoisde rona tiha alegasaun husi parte sira, no bazea ba faktus provadus sira ne'ebé mak produs durante julgamentu, tribunál konklui prosesu ne'e kondena arguidu ho pena prizaun fulan 3 suspende ba tinan 1.

48. Krime ofensa ba integridade fizika simples ho natureza violénsia doméstika - Nú. Prosesu. 165/pen/2014/TDS.

Kompozisaun tribunál : Singular
Juis : Dr. Costâncio Barros Basmery
Ministériu Públiku : Dr. Mateus Soares
Defeza : Dr. Manuel Amaral (defensória públiku)
Konkluzau : Kondena ho pena prizaun fulan 3 suspende ba tinan 1

Iha 26 Fevereiru 2015, Tribunál Distritál Suai liu husi tribunál movél iha Distritu Bobonaro, julga arguidu MF ne`ebé komete krime violénsia doméstika hasoru nia feen, iha Distritu Bobonaro.

Ministériu Públiku akuza katak iha 22 Abril 2012, arguidu tebe dala ida iha lezada nia kanotak, tuku dala rua iha ren-toos no tilun-hun no kauza lezada sofre bubu no moras. Kazu ne`e akontese tanba arguidu ho lezada diskuti malu kona-ba rezulta kuileta haree ne`ebé arguidu haruka atu fahe ho toos-na`in, maibé lezada lakohi.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu, arguidu konfesa faktu hotu iha akuzasaun, hatudu arependementu ba nia hahalok, promete sei la komete tan krime hanesan iha futuru no husu ona deskulpa ba lezada.

Iha parte seluk lezada deklara ba tribunál katak diak malu ona, perdua ona arguidu tanba rezolve ona arguidu fó karau ida no belak ida.

Iha alegasaun finál, ministériu públiku husu ba tribunál atu aplika pena ne`ebé mak adekua ba arguidu. iha parte seluk defeza husu ba tribunál atu apilika pena suspensaun ba arguidu.

Depoide rona tiha alegasaun husi parte sira, no bazeia ba faktu provadus sira ne`ebé produz durante julgamentu, tribunál konklui prosesu ne`e no kondena arguidu ho pena prizaun fulan 3 suspende ba tinan 1.

49. Krime ofensa ba integridade fizika simples ho natureza violénsia doméstika - Nú. prosesu. 03/pen/2014/TDS.

Kompozisaun tribunál : Singular
Juis : Dr. Álvaro Maria Freitas
Ministériu Públiku : Dr. Jose Ello
Defeza : Dr. Joao Henrique de Carvalho (defensória públiku)
Konkluzau : Kondena ho pena multa

Iha 26 Fevereiru 2015, Tribunál Distritál Suai liuhosi tribunál movél iha Distritu Bobonaro, julga arguidu NCA ne`ebé komete krime violénsia doméstika hasoru nia feen, iha Distritu Bobonaro.

Ministériu Públiku akuza katak iha 16 Setembru 2014, arguidu lori fatuk tuda iha lezada nia liman no tuku dala ida iha kotuk laran no kauza lezada sofre bubu no moras.

Kazu ne'e akontese tanba arguidu nervoju wainhira fila husi ko'a duut hodi fóhan karau no husu kafe ba lezada maibé lezada dehan kafe seidak halo.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu arguidu hili direitu nonok. Wainhira tribunál husu fali ba lezada no lezada kontinua reforsa faktu sira akuzasaun. Maske nune'e lezada mos deklara katak sira diak malu ona.

Iha alegasaun finál, ministériu públiku konsidera katak faktu hotu-hotu provadu tanba ne'e husu ba tribunál atu aplika pena multa US\$60.00 kada loron US\$1.00. Iha parte seluk defeza husu ba tribunál atu aplika pena ne'ebé mak adekua ba arguidu.

Depoide rona tiha alegasaun husi parte sira no bazeia ba faktu provadu sira ne'ebé mak produz durante julgamentu, tribunál konklui prosesu ne'e no kondena arguidu ho pena multa US\$ 60.00.

50. Krime ofensa ba integridade fizika simples ho natureza violénsia doméstika Nú. Prosesu. 240/pen/2014/TDS.

Kompozisaun tribunál	: Singular
Juis	: Dr. Álvaro Maria Freitas
Ministériu Públiku	: Dr. Jose Ello
Defeza	: Dr. Joao Henrique de Carvalho (defensória públiku)
Konkluzau	: Kondena ho pena multa

Iha 26 Feveireiru 2015, Tribunál Distritál Suai liu husi tribunál movél iha Distritu Bobonaro, julga arguidu MdCC tanba komete krime violénsia doméstika hasoru nia feen (MS) no nia oan (SdCC) iha Distritu Bobonaro.

Ministériu Públiku akuza katak iha 02 Agostu 2014, arguidu basa dala haat iha nia oan-mane (SdCC) nia hasan, kaer iha ain ho liman lalar ba ahi, sama ba rai no lori nuu kelen hanehan iha ulun. Aktu hirak ne'e rezulta lezadu sofre kanek iha isin sira ne'ebé lalar ba ahi, bubu no moras.

Kazu ne'e akontese tanba lezadu sai husi uma durante loron tomak la fila ba uma hafóin arguidu buka hetan iha tos laran haneruk hela ahi ho kolega sira.

Tuir mai iha 03 Agostu 2014, arguidu tebe nia feen (MS) ninia kotuk laran dala tolu no rakut iha fuuk riba ba rai no sama iha kotuk laran. Kazu ne'e akontese tanba arguidu la fó osan ba lezada, tanba ne'e mak lezada hirus arguidu no arguidu komete krime ne'e.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 2, 3 alinea a, 35 Lei Kontra Violénsia Doméstika.

Iha julgamentu, arguidu nega faktus hotu ne'ebé mak konsta iha akuzasaun no deklarata katak arguidu la baku nia oan-mane. Arguidu deklarata katak kanek ne'ebé lezadu hetan ne'e tanba lezadu hemu tua lanu mak monu tun ba ahi. Tribunál konfirma ba deklarasaun lezadu SdCC, maibé iha audiensia lezadu la koho kolia.

Tuir deklarasaun lezada MS nian katak ba faktus hotu iha akuzasaun loos hotu, lezada mós refórta tan katak kona-ba lezadu SdCC nia kanek ne'e arguidu mak sunu ba ahi.

Tuir deklarasaun testamuña nian katak testamuña la hare ho matan kona-ba akontesementu ne'e, maibé wainhira fila husi eskola hare lezadu tur hela iha uma oin no nia liman bobar hela ho hena mutin.

Iha alegasaun finál, ministériu públiku haktuir katak arguidu nega ba faktus hotu ne'ebé mak konsta iha akuzasaun, maibé lezada kontinua mantein faktu sira iha akuzasaun. Tanba ne'e, husu ba tribunál atu aplika pena multa US\$200.00 kada loron sei selu US\$1.00.

Iha parte seluk defeza haktuir katak arguidu la hatudu nia arependimentu ba aktu ne'ebé akuza ba arguidu, tanba laos arguidu mak baku lezadu, no laiha relatoriu mediku mak junta iha akuzasaun. Tanba ne'e, husu ba tribunál atu aplika pena ne'ebé justu no adekua ba arguidu.

Depoizde rona tiha alegasaun husi parte sira, tribunál konklui prosesu ne'e no kondena arguidu ho pena multa US\$.200.00 sekarak la kumpri pena multa ne'e, sei kumpri pena alternativu fulan 4.

51. Krime ofensa ba integridade fizika simples ho natureza violénsia doméstika – Nú. Prosesu: 257/pen/2014/TDS.

Kompozisaun tribunál	: Singular
Juis	: Dr. Argentino Nunes
Ministériu Públiku	: Dr. Antonio da Silva Tavares
Defeza	: Dr. Manuel Amaral (defensória públiku)
Konkluzaan	: Kondena ho pena prizaun fulan 2 suspende ba tinan 1.

Iha 27 Feveiru 2015, Tribunál Distritál Suai liu husi tribunál movél iha Distritu Bobonaro, julga arguidu FdSM tanba komete krime violénsia doméstika hasoru nia feen, iha Distritu Bobonaro.

Ministériu Públiku akuza katak iha data ne'ebé la klaru, pelomenus iha tinan 2013 nia laran, arguidu tuku dala rua iha lezada nia kanuruk no kauza moras. Kazu ne'e akontese tanba lezada lori labarik ba vizita nia avo sira maibé wainhira fila lezada mesak, ne'e-mak halo arguidu nervozu hodi komete krime ne'e.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu, arguidu konfesa integralmente ba faktus iha akuzasaun, arepende nia hahalok no agora diak malu ona. Aleinde ne'e, lezada mós deklara katak sira diak malu ona.

Iha alegasaun finál, ministériu públiku haktuir katak faktu sira iha akuzasaun provadu hotu, no maske arguidu arepende nia hahalok, maibe husu ba tribunál atu aplika pena ne'ebé mak adekua ba arguidu.

Iha parte seluk defeza hare katak arguidu arepende, foin primeiravez komete krime, husu ba tribunál atu aplika pena suspensaun ba arguidu.

Depoizde rona tiha alegasaun husi parte sira, no bazea faktus provadus sira ne'ebé mak produz durante julgamentu, tribunál konklui prosesu ne'e no imediatamente le'e desizaun hodi kondena arguidu ho pena prizaun fulan 2 suspende ba tinan 1.

52. Krime ofensa ba integridade fizika simples ho natureza violénsia doméstika – Nú. Prosesu: 145/pen/2014/TDS.

Kompozisaun tribunál	: Singular
Juis	: Dr. Argentino Nunes
Ministériu Públiku	: Dr. Antonio da Silva Tavares
Defeza	: Dr. Manuel Amaral (defensória públiku)
Konkluzau	: Kondena ho pena prizaun fulan 3 suspende ba tinan 1 fulan 6

Iha 27 Feveiru 2015, Tribunál Distritál Suai liu husi tribunál movél iha Distritu Bobonaro, julga arguidu JB ne'ebé komete krime violénsia doméstika hasoru nia feen (SA) no nia primu (MS), iha Distritu Bobonaro.

Ministériu Públiku akuza katak iha 22 Marsu 2014, arguidu kastigu lezadu MS hakneak tanba la tunu naan ba arguidu han hodi hemu tua.

Tuir-mai iha 23 Marsu 2014, arguidu tuku no tebe nia feen (SA) ninia kotuk laran no kauza bubu no moras. Kazu ne'e akontese tanba sira diskuti malu kona-ba problema ne'ebé akontese ona antes.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha julgamentu arguidu deklara ba tribunál katak nia la kastigu nia primu, maibé kona-ba tuku no tebe lezada ne'e los hotu. Maske nune'e, arguidu deklara katak nia arepende ninia hahalok, no promete sei la komete tan krime hanesan iha futuru. Iha parte seluk deklarasaun husi lezada (SA) nian kontinua konfirma akuzasaun ministériu públiku nian.

Iha alegasaun finál, ministériu públiku haktuir katak arguidu konfesa totalmente ba faktus hotu iha akuzasaun, diak malu ona, tanba ne'e husu ba tribunál atu aplika pena prizaun fulan 6 suspende ba tinan 2.

Iha parte seluk defeza mós konsidera katak arguidu konfesa faktu hotu-hotu, arepende nia hahalok, tanba ne'e husu ba tribunál atu aplika pena ne'ebé adekuaudu ba arguidu.

Depoisde rona tiha alegasaun husi parte sira, no bazeia ba faktus provadus sira ne'ebé mak produz durante julgamentu, tribunál konklui prosesu ne'e no kondena arguidu ho pena prizaun fulan 3 suspende ba tinan 1 fulan 6, selu mós kustas judisiariu US\$ 10.00.

53. Krime ofensa ba integridade fizika simples ho natureza violénsia doméstika - Nú. Prosesu:215/pen/2014/TDS.

Kompozisaun tribunál : Singular
Juis : Dr. Argentino Nunes
Ministériu Públiku : Dr. Antonioda Silva Tavares
Defeza : Dr. Manuel Amaral (defensória públiku)
Konkluzau : Pena prizaun fulan 7 suspende ba tinan 1 fulan 6

Iha 27 Fevereiru 2015, Tribunál Distritál Suai liuhosi tribunál movél iha Distritu Bobonaro, julga arguidu AdR tanba komete krime violénsia doméstika hasoru nia feen, iha Distritu Bobonaro.

Ministériu Públiku akuza katak iha 30 Janeiru 2014, arguidu lori ahi tukan ne'ebé lakan hodi tuu ba iha lezada nia isin no kauza kanek no hetan tratamentu iha hospitál durante semana ida. Kazu ne'e akontese tanba arguidu diskunfia lezada ba mane seluk.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

Iha audiensia julgamentu arguidu hili direitu nonok. Wainhira tribunál konfirma fali ho lezada no lezada deklara katak faktu sira iha akuzasaun ne'e loos hotu. Maibe agora sira diak malu ona.

Iha alegasaun finál, ministériu públiku haktuir katak bazeia ba faktu provadu hirak ne'e nomós relatori mediku hosi ospitál nian, husu ba tribunál atu aplika pena prizaun tinan 1 suspende ba tinan 2 fulan 6.

Iha parte seluk defeza haktuir katak, arguidu arepende nia hahalok, foin primeiravez komete krime, diak malu ona ho lezada tanba ne'e husu ba tribunál atu aplika pena ne'ebé mak adekuaudu ba arguidu.

Depoisde rona tiha alegasaun husi parte sira, no depois avalia prosesu sira ne'ebé relasionadu ho kazu ne'e, tribunál konklui prosesu ne'e no kondena arguidu ho pena prizaun fulan 7 suspende ba tinan 1 fulan 6.

**54. Krime ofensa ba integridade fizika simples ho natureza violénsia doméstika -Nú.
Prosesu: 253/pen/2014/TDS.**

Kompozisaun tribunál : Singular
Juis : Dr. Argentino Nunes
Ministériu Públiku : Dr. Antonio da Silva Tavares
Defeza : Dr. Manuel Amaral (defensória públiku)
Konkluzau : Adia

Iha 27 Feveiru 2015, Tribunál Distritál Suai liu husi tribunál movél iha Distritu Bobonaro adia julgamentu ba krime violénsia doméstika ne`ebé komete husi arguidu JdSD hasoru nia feen, iha Distritu Bobonaro. Julgamentu u ne`e adia tanba arguidu ho lezada la marka prezensa.

**55. Krime ofensa ba integridade fizika simples ho natureza violénsia doméstika - Nú.
Prosesu. 200/pen/2014/TDS.**

Kompozisaun tribunál : Singular
Juis : Dr. Argentino Nunes
Ministériu Públiku : Dr. Antonio da Silva Tavares
Defeza : Dr. Manuel Amaral (defensória públiku)
Konkluzau : Adia

Iha 27 Feveiru 2015, Tribunál Distritál Suai liu husi tribunál movél iha Distritu Bobonaro, adia julgamentu ba krime violénsia doméstika ne`ebé komete husi arguidu BfB hasoru nia feen, iha Distritu Bobonaro.

Julgamentu ba kazu ne`e tribunál adia, tanba arguidu ho lezada la marka prezensa iha audiensia julgamentu.

**56. Krime ofensa ba integridade fizika simples ho natureza violénsia doméstika Nú.
Prosesu. 233/pen/2014/TDS.**

Kompozisaun tribunál : Singular
Juis : Dr. Argentino Nunes
Ministériu Públiku : Dr. Antonio da Silva Tavares
Defeza : Dr. Manuel Amaral (defensória públiku)
Konkluzau : Adia

Iha 27 Feveiru 2015, Tribunál Distritál Suai liuhusi tribunál movél iha Distritu Bobonaro, adia julgamentu ba kazu violénsia doméstika ne`ebé komete husi arguidu YNdS hasoru nia feen, iha Distritu Bobonaro.

Julgamentu ba kazu ne`e tribunál adia, tanba arguidu ho lezada la marka prezensa iha audiensia julgamentu.

Atu hetan informasaun liutan bele kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Face book: www.facebook.com/timorleste.jsmp

Twitter: @JSMPTl